



HARVARD COLLEGE LIBRARY
FROM THE
HARVARD-YENCHING
INSTITUTE
MAR 13 1931

1

T Ch L 2148-70/8202





各系其終

國
東
金
日
國

北平翁覃溪著

寧東金石略

石洲堂梓

寧東金石略自序



世多稱集古自歐陽子然碑集之作始於陳勰謝莊述矣而梁時書目已有廣州刺史碑十二卷悉得以服嶺以南限哉爰逮會昌元祐際侘傺竚眙幽聽遙思或軼弗盡章而唐以前源漢熹平翠琰之氣沙水汨之每對海瀾而遐晷也然什一存者猶作其芒出丹砂水銀南金大貝之上方綱八年五周歷崖捫蘚剔所得蓋五百餘種錄為十二卷以其有與圖經可互証者故於受代之頃錄諸板而補訂討論以俟異日若周憬功勳銘收於洪氏輒取鄭志文言略例三禮目錄之義書之其文雖具而弗備書則世

所共見也又如某段某行幾字必与州運寸尺之類或先有拓本已而蠹且失弗追記矣蓋八年之中而拓本已蠹且失如此其惡得不著

乾隆三十六年冬十月二十二日大興翁方綱

肇自卷端

聖祖仁皇帝宸翰

皇上宸翰共二十八條恭錄為首卷次廣州府金石六十七種為第一卷次廣州南海神廟金石六十七種為第二卷次廣州清遠禺峽山諸刻三十九種西樵山二十六種為第三卷次韶州府金石二十二種為第四卷又二十

六種為第五卷又韶州碧落洞諸刻二十四種南山諸刻二十七種泐溪石室五種為第六卷次連州金石四十四種為第七卷次肇慶府七星巖諸刻六十二種三洲巖諸刻十五種陽春巖二種為第八卷次肇慶府金石十種惠州府十三種潮州府三十三種嘉應州二種高州府三種廉州府一種雷州府五種瓊州府十三種為第九卷最後附九曜石考上下二卷凡九曜石諸刻二十八種凡粵東金石著錄者五百六十二種為卷十有二為紙一百九十四頁

粵東金石略卷首

皇書曾藏自強齋

日講起居注官翰林院侍讀學士廣東學政臣翁方綱恭錄

聖祖仁皇帝御書南海神廟碑

御書萬里波澄四大字揭于殿楹戶部右侍郎臣范承烈恭摹上

哈佛大學哈佛燕京圖書館珍藏印

石建碑亭于廟之大門外

後跋云

皇上御極之四十二年

萬壽初屆五旬爰隆秩望錫以龍章甚盛典也而南海則小臣承烈奉

命祇事焉珠宮貝闕

宸翰寵頒雲漢光華照耀無極百谷之王將永戴而率舞矣豈止梯航重譯者進海不揚波之頌已哉

戶部右侍郎加七級臣范承烈恭紀

陪祭官布政使司布政使加一級臣佟毓秀恭勒

肇慶府閱江樓

聖祖仁皇帝御書碑六

岳牧之任四大字字徑尺上鈐康熙

御筆之寶

橫幅端方二字字大七寸五分上鈐康熙

御筆之寶下

臨米芾淨名齋記

臨董一碑凡二條家在洞水西身作蘭渚客天盡無纖雲獨坐空江

碧唐句御溝風細水生波喜得春來暖漸多堦下絕

無塵迹到橋邊只有侍臣過臨其昌

臨米一碑蘋風忽起吹舟桿雨打圖書袞裏亂閭門只尺不安流

何況盟津與江漢非無輕楫並長楫逆風流水適相遭須
與風迴水流順星宿乘槎問月高閭門舟中戲作帶

駐蹕閭門舟中臨

臨董一碑小行書含漱金醴吞玉英遂至不飢三蟲三心意常和

致欣昌五岳之雲氣彭亨保灌玉廬以自償五形完堅無

灾病上覩三元如連珠落落明景照九隅五靈夜燭煥八

區子存內皇與我游身披風衣御帝書甲戌四月臨董

其昌

一碑勒便面四一

書戰馬初聞甲士歡揮戈早已破樓蘭彌天星斗銷兵氣照激邊

粵東金石錄卷之四

山五月寒

班師之作

御書凱旋詩扇一柄朕凱旋時所作詩因萬幾之暇偶書於扇賜卿閩地濕熱此扇之清風可以解之一

書溪上遙聞精舍鐘泊舟微徑度深松青山霽後雲猶在畫出西南四五峰一

書田田荷蓋雨聲齊樓蕊繽紛向晚迷樹葉不愁點翠幄秧針豈憶灌青畦密林有意通宵響茂草無知徧地萎偶爾喜吟今歲好湯將詩句入新題 千葉蓮池夜聞雨滴之聲一

書亂泉飛下翠屏中色共真珠巧綴同一片長垂今與古半山還影水兼風雅無舒卷隨人意自有潺湲滴物功每向暑天

來往見疑將仙子隔房櫳 唐律

以上六碑

賜總督郭世隆康熙丙戌募上石世隆有跋恭紀刻碑於側

端溪書院挾天閣

御書碑十有四

一碑樂善不卷四字字高一尺有三寸濶一尺橫書上有康熙

御筆之寶

一橫幅永思二字字高一尺濶八寸有康熙

御筆之寶

一碑觀時見物理主敬得天真十字字方員五寸
一碑雲裏帝城雙鳳闢雨中春樹萬人家十四字字逕七

寸
一碑

御製虎跑泉詩松林帶餘雪空山啼百舌石罅響涓涓寒泉自清

潔
虎跑泉

一碑

臨董新林二月孤舟還水滿清江花滿山借問故園隱君子時時

來往在人間
臨其昌

一碑

臨董書天馬賦壬午冬十二月臨董其昌

一碑

臨米書杜詩衛幕銜恩重一首

一碑

臨趙孟頫書秋興賦并序康熙甲午孟春臨

又一碑

皇太子書七絕一首似將金甲寄春農阡陌軍中細柳同如

此四朝歌渡虎肯令三輔有飛鴻

以上十碑俱

賜督臣趙宏燦摹勒上石

一碑殿邦炎州四大字字高一尺四寸濶一尺二寸橫書
有康熙

御筆之寶

一碑

御製春幸詩一為陽德借天和賓日中衡社後過東作勤耕勞衆
力西成有獲廣農科官箴先戒關河固節鉞猶經歲月多正己
精心率庶吏宣恩莫使政煩苛 春幸

一橫幅前列便面一

書四言詩一章君子之道闇然日章蕙蘭之臭有風則香草木培
植格物知詳飛潛動靜各有收藏純精天地青紫芬芳奇卉松

島移根草堂 題蘭後

書面銘一篇

跋云朕所書太極圖說西銘不止數百今丁酉仲春南旋舟中頗
暇故又書以示所好

以上三碑俱

賜督臣楊琳摹勒上石

一碑

御製御稻詩紫芒半頃綠陰陰最愛先時御稻深若使炎方多廣
布可能兩次見秧針 早御稻

以上一碑

賜督臣馬爾泰摹勒上石有爾泰恭跋

惠州西湖

御碑一 在栖禪寺之西堤

御書樓上

草書今代麒麟閣何人第一功君王自神武駕馭必英雄 臨董

其昌 廣東提督臣王文雄恭摹勒石

廣州府學

御製為考試歎碑人才當義取王道豈分更放利來多怨狗私有

惡聲文宗濂洛理士仰楷模情若問生前事尚憐死後名 為

考試歎 有康熙

御筆之寶康熙四十一年十二月

御製為考試歎詩四十二年十一月

賜提督廣東學政臣翁嵩年恭勒石並嵩年恭和詩二首勒于碑

陰又有總督兩廣臣郭世隆恭跋

府學

御碑亭內

平定朔漢告成太學碑康熙四十三年三月二十一日

御製平定金川告成太學碑乾隆十四年歲在己巳夏四月吉

日 經筵講官 太子少師協辦大學士吏部尚書臣梁詩正奉 敕敬書

御製平定準噶爾告成太學碑乾隆二十年歲次乙亥夏五月

之吉

御筆

御製平定回部告成太學碑乾隆二十四年歲次己卯十二月之吉

御筆

廣東金石略卷第一
廣州府金石一
至聖先師像碑
先師像碑在廣州府學後圃番山燕居亭摹吳道子筆也
左有篆書
宣聖遺像四字右有八分書一段叙摹勒原委至正五年
乙酉正月望日中奉大夫廣東道宣慰使都元帥僧家
奴記承直郎廣東道宣慰使司都元帥府經歷貢師謙
篆額廣東憲曹天台張誼書
宣聖克公小影碑

粵東金石略卷第一

廣州府金石一

至聖先師像碑

先師像碑在廣州府學後圃番山燕居亭摹吳道子筆也

左有篆書

宣聖遺像四字右有八分書一段叙摹勒原委至正五年

乙酉正月望日中奉大夫廣東道宣慰使都元帥僧家

奴記承直郎廣東道宣慰使司都元帥府經歷貢師謙

篆額廣東憲曹天台張誼書

宣聖克公小影碑

在燕居亭前元皇慶二年癸丑良月廣州路學重刊謹
按顏子唐贈兗國公宋曰之元至順時始贈復聖公此
碑尚在改贈之前故仍兗國之號

此碑下段勒重摹顏魯公書廟堂記

廣州府學宮圖碑

在

宣聖克公小影碑陰隸額下有記述脩造工費一段天順
癸未淳安胡拱辰書其書亦可觀而文特委曲詳悉昔
人稱店賬鋪券皆可鋪叙為文者也雖未免近于延君
說書之誚然亦見昔人辦事不苟處

淳熙增置廣州贍學田記

隸額陳德銘行楷書後半多泐

又有學田段畝步下項一碑皆州人沒入官田號數淳
熙十一年正月日記此當與前碑同時立

嘉熙增修學廩記

文已不完前有嘉熙丁酉字後有廣州州學教授合沙
劉漢英撰文此碑字畫完者尚有筆意可觀

廣州府學元碑

篆額詔文大德十一年七月日上天眷命皇帝聖旨云
楷帶篆法

明嘉靖御書程子四箴范香溪心箴

凡六碑動箴碑後跋云斯四箴者作之在於程頤以斯
四箴而致其君者乃吾輔臣張璁也箴之功不在程氏
而在于璁云；嘉靖丁亥歲季冬越三日注又一碑有
張璁奏摹宸翰刻布凡三段後又有楊一清謝遷張璁
翟鑾題請將敬一箴重刻設于亭中并奉勅旨以敬一
名亭一段外又有敬一箴碑一通 此數碑諸郡皆有
摹刻惟廣州全存

杏壇碑

杏壇二篆字長各二尺許其陰篆額文凡上下二段賦

在上方八分書崑山衛塔寧深造下方一段賦跋也大
略謂廣州府學明倫堂前大成殿後有巨石刻杏壇二
篆字元泰定間教授呂宏道立其書則范經□□仁也
左都御史馬公昂於嵩山亭後闢地為壇重刻此石劉
崑山衛寧深所作賦於石後鄭教授萬奎請書其事石
下天順四年秋九月朔日判廣州府前翰林院學士金
城黃諫跋并書亦帶有隸古意

嘉靖重修廣州府儒學記

嘉靖二十一年壬寅十月南京國子監祭酒南海倫以
訓撰文署掌南京翰林院事香山黃佐書丹

湛文簡大成樂記

嘉靖三十八年己未正月二十六日前南京兵部尚書

國子監祭酒翰林侍讀學士同脩國史九十四甘泉生

增城湛若水撰文

明碑不具錄錄以其人潮州改割濂溪先生祠記則文簡書也時為嘉靖三十三年甲寅正月九日文簡季八

九十

乾隆三十四年春

上以重脩太學落成

特頒內府周范彝器陳

大成殿中方網校士嶺海既率博士弟子頌歌

盛典爰飭所司詳加考訂祭器樂器鑄造歲月日彙為冊

用昭敬守而諸學宮所范器無甚古者故略擯數件附

記廣州學碑刻後

廣州府學銅爵六陽識泰定乙丑濂泉書院山長倉克

義任內置掌儀彭九思監造銅籩十三銅簋一識同

銅籩二陽識至正二年正月吉日廣州路儒學教授傅

若金補置掌殿張常德監造

銅籩二十陽識廣州路學四字銅簋二簋五識同

南雄府學大銅香爐一陰款亞中大夫南雄路總管府

達魯花赤兼管內勸農事密吏奢提調儒學鑄造以供

先聖祭祀至正乙未年孟夏吉旦誌

惠州府學銅簋四銅簋十皆陽識延祐乙卯教授鄭焱
孫任內置海豐教諭梁若水掌儀邛子昌督工吉安鑄
匠楊榮甫

王象之輿地碑記曰吳隱之貪泉記在廣州治廳事東

又貪泉碑唐南海別駕陳元伯銘舊植于泉之側亭上

今徙於廣平堂鄭氏通志金石略云貪泉銘一篆書一分書在廣州又廣州都督宋公遺

愛碑頌張說撰宋公諱璟饗軍堂記柳子厚文又廣州古塼塼

面範四大字云委於鬼工魏侍郎瓘知廣州日所得十賢

贊并後序蔣之奇撰州學記王十朋撰今皆不存

貪泉碑今在廣州石門刻貪泉二大字字徑一尺五寸

明萬曆二十二年四月郡人右布政使李鳳等立其上

刻晉刺史吳隱之詩

拱北樓銅漏壺識

延祐三年十二月十六日造後列廣東宣慰使司元帥

府監鑄諸官姓名凡十九行

光孝寺菩提樹髮塔記

記勒石於儀鳳元年丙子法性寺住持僧法才立文載

曹溪志志云此碑見存省城光孝寺菩提樹下乃唐刻

也然今樹下之石乃明萬曆壬子重刻

寶曆石幢

在光孝寺二門西榕樹下兩面皆有字同徑略副使將
仕郎前守辰州都督府鑿博士廬江郡何宥則敬為亾
兄節度隨軍文林郎守康州司馬宥卿造此大悲陀羅
尼幢

寶曆二年歲次景午十二月一日法性寺住持大德兼
蒲澗寺大德僧欽造書欽造閩川人正書

光孝寺鐵塔識

廣州光孝寺有二鐵塔其在東院者以黃金塗之南漢
主劉鋹所造塔下一層識云大漢皇帝以大寶十奉丁

缺是歲勅有司用烏金鑄造千佛寶塔一座七層并相缺志

蓮花座高二丈二尺保龍缺志有慶祈鳳歷無疆萬方咸

缺志於清平八表永承於交泰作窮後善十國春秋三有福

被四息以回缺是乾德節設齋慶讚謹記其南面之左云

內殿大僧錄教中大法師金紫光祿缺志檢校工部尚

書曉真大師沙門臣此缺處似首字右云教中大法師內

供奉講經首座金紫缺志夫檢校工部尚書寶法大師

沙門臣志作監其餘數面款文皆不可拓据志北面之

左云教中大法師內供奉金紫光祿大夫檢校工部尚

書紹喜大法師沙門監造右云教中大法師金紫光祿

大夫檢校工部尚書了聞沙門監造東面之左云都監

住持秀華宮使上將軍上柱國□伯食邑十萬戶□□
 監造寺西院又有千佛鐵塔其識云玉清宮使德陵使
 龍德宮使開府儀同三司行內侍監上柱國龔澄樞同
 女弟子鄧氏三十二娘以大寶六年歲次癸亥志在五月其誤
 壬子朔十七日戊辰鑄造永充供養兩塔高大略相等
 東塔較高朱竹垞謂見二塔並立一屋中修短不齊一
 作記一題名始悟曩時拓本合二為一記之不詳疑未
 得其實也又謂其列名皆宦者今觀其列名皆沙門監
 造而宦者惟龔澄樞一人且其塔乃澄樞自造又在銀
 所造之前亦不得合為一也

又按竹垞書鐵塔銘後記劉龔塚碑事與王文簡皇華
 紀聞所載頗有錯互余甲申秋將出都時錢辛楣學士
 昕首以此託為攷訂比抵粵訪諸官吏與土人問其所
 謂北亭者在番禺城東二十里許而劉龔之塚與碑則
 竟無知者蓋二先生亦皆非得自親睹所以傳寫或有
 訛失即如竹垞所記係光天元年而文簡則疑光天無
 五年而所據載者乃作五年廣東新語又盧應下文簡所亦作元年
 記是初字廣東新語所記是勅字俱無奉字而竹垞所
 記則多一奉字安知初字非即勅字之誤乎竹垞稱陳
 元孝語予云則是竹垞既得自口傳而元孝復出自

記憶無怪乎王朱兩先生之傳聞異詞矣

大隆禪師殿記

文与額皆正書在光孝寺六祖殿前

咸淳五年十一月初七日華文閣直學士通奉大夫廣南東路經略安撫使馬步軍都總管兼知廣州軍州事兼管内勸農使陳宗禮記朝散大夫提舉廣南東路常平義倉茶鹽公事兼權運判冷應澂題蓋宣教郎知廣州南海縣主管勸農公事兼弓手寨兵軍正王應麟書寺之伽藍殿內大鐵鑊有延祐年字已磨滅不可識寺東禪室後池上有鄺湛若八分書洗硯池三大字有

題鄺露二字州書

寺有米元章書三世佛名凡十二字在祝聖殿梁間討記於此

六榕寺證道歌碑

六榕寺舊有王勃碑今不可見矣永嘉禪師證道歌一碑兩面皆刻字合碑陰讀之皆七言歌詞文尚不完又無他本可對而其上篆額曰皇宗廣州重開永嘉亦似文未完者碑字勁逸似坡公書

寺舊為淨慧寺蘇長公南遷過此書六榕二大字目以六榕名今寺

額即蘇書也然稍板是摹本

庚寅秋又得石五片合成一面其上橫額證道哥碑四

篆書此是前碑之第四幅應尚有其一幅不知在何處也此碑裂為六訪得其五而合之尚少中腹一段詩詞後小字蓋其跋也斷落不數行矣略見者上半皆論佛書語下有□□慧禪□□□□□□□□□□年年字只露下脚不甚明丙子□□□□□□□□□□□□□□□□沙門□□賜紫住□□□□慧禪

寺有宋紹聖間寶雞主簿林修重建碑宗室康州刺史州盜撰王渙洋先生載諸廣州遊覽小志今亦不見五仙觀古成之詩碑

隸額曰古僊舊題中二段州書七律一首五律十韻一

首下段跋云紫虛真仙古成之字亟真所題遺什再勒翠珉不書季月跋以古為增城人与惠州志不同

孫典籍重修五仙觀記

洪武二年己酉暮春郡人孫蕢撰臨川吳湯舉書朱竹垞言觀有建中靖國碑今訪問無知者矣

五仙觀鐘識

五仙觀鐘識大篆書徑二三寸洪武十一年戊午孟春十八日辛卯廣東等處承宣布政使司鑄造

五仙觀湛甘泉詩碑

白蓮池上訪仙蹤有仙跡□聽攢眉夜夜鐘七十年前燈火

地東尋無路白雲封甘泉子成童館坡山白蓮池東房
嘉靖甲寅夏李□□青霞父子邀飲於大鐘之樓舊跡
變遷惕焉感懷時是秋七月三日南京兵部尚書湛
若水書

寺內東側三元殿前有池片石陂陀泉出其中刻仙
人足跡四字

真武像贊

石刻在五仙觀嘉靖乙丑羅浮山人黎民表八分書

海珠寺觀音像

右方款云唐吳道子作上有正書摩訶般若波羅密多

心經万曆己亥仲春鎮守廣東都督雲間侯繼高薰沐
謹募并書碑陰又一像像後題云大明萬曆丁亥年造
下□□重修前有文一段六行行八字類頌聖祝釐之
詞字皆泐不可辨上有慈聖宣文明肅皇太后之寶

蒲礪寺藪詩

蘇詩廣州蒲礪寺七律舊刻已失明人劉介齡集公書
摹勒上石第四句漏天誤作洞天第五句方士宅誤作
居士宅

寺又一碑介齡行艸書萬里雲間成立馬劍門關亂山
極目無際西北是長安人苦百年塗炭鬼泣三邊鋒鏑

天道久應還手寫田屯秦炯炯寸心丹 對青燈搔白
髮漏聲殘老來勲業未就妨却一身閒蒲礪清泉白石
梅嶺綠陰青子恠我舊盟寒烽火平安夜歸夢到家山
右水調歌頭清獻公寓蜀作句有蒲礪清泉白石曰謀
并蘇作刻焉二公高風餘韻千載洒然令人追慕後學
劉介齡跋并書萬曆丁亥歲暮勒上石

此詞崔氏祠堂別有石刻白沙書第四句作直北是長
安第六句泣作哭梅嶺句在蒲礪句之上後跋云右調
水調歌頭吾鄉前輩菊坡先生宋丞相清獻崔公鎮蜀
時題劔閣即此詞也曩夢拜公坐我于林与話平生仕

止久速偶及之仰視公顏色可親一步趨間不知其已
翱翔於蓬萊道山之上欲從之上下而無由曰請公手
書公忻然命具紙筆烏虜古今幽明一理人之所見則
有同異感而通之其夢也耶其非夢也耶今書遺其後
七世孫同壽云宏治甲寅冬十月白沙陳獻章識
祠又有宏治十三年左布政使周孟中等祭清獻文石
刻亦白沙書

靈峰山蘓詩石刻并像

靈峰山一名靈洲山在廣州城西北七十里有寶陀院
妙高臺蘓文忠以元符三年十月題詩於此即集中前

世德雲今我是絕句也今石是元泰定二年乙丑重摹
承德郎廣州路南海縣尹兼勸農事雷易張拱辰摹本
下有拱辰自記又明萬歷十七年南海朱完繪文忠像
雷易劉克平八分書讚克平併繪晉郭景純像于石以
景純有南海盛衣冠之氣一語也景純像又有朱完八
分書劉克治楷書二讚又有明嘉靖中閩陳謹和蘓韻
詩萬歷丙戌年吳文華詩己丑年馮渠詩己亥年祝以
幽詩壬寅年陳性學李時華詩數碑不具錄
程周量云靈峰碑凡六幅字与此詩等又有公書超然
臺記又有環翠亭牘尔公筆廣二尺許字體与詩記異

今皆不見

南漢大寶五年石塔記

東莞縣資福寺石塔南漢禹餘宮使邵廷瑁以羣象害
稼聚象骨建石塔以鎮之記文已剝壞首行略云以大

寶

禁乙卯朔六日庚申

字面招討使特進行內侍監上

柱國

以下不可辨

此下略云買地一段砌塔五層四面龕室裝

嚴云、自五六行以下皆偈銘益模糊不可讀凡拓二

紙

南海古跡記云東莞鎮象塔禹餘宮使邵廷瑁造禹餘宮漢離宮也廷瑁官名

僅見於此邵廷瑁事後主官內常侍大寶初宋已易周祚廷瑁言於後主曰真
主已出必將盡有海內其勢非一天下不已請飭兵備且遣使通好於宋後主惡廷
瑁言直深恨之及潘美陷柳州始思廷瑁言詔廷瑁為招討使率舟兵屯洗口廷瑁
招輯亡叛訓士卒修戰具國人賴以少安或誣廷瑁將圖不軌後
主遽遣使賜死士卒立廟祀之今尚在洗口而土人無知者矣

蘇文忠所撰資福寺羅漢閣記邑人云尚存片石及拓
來視之則邵塔之後半也

王象之碑目東莞縣五百羅漢閣
記蘇軾撰又有舍利塔銘詞并書

邑有十

龍潭潭上石刻飛泉紫虛洞天六字石峻潭深竟不可

拓

陳白沙慈元廟碑

慈元殿在新會崖山上成化中廣東右布政劉大夏建
以祀宋楊太后碑立於宏治己未夏行艸書自跋云病
愈後尚未堪筆硯念作祠之意久未聞於天下力疾書
之後有增城門人湛雨跋

陳白沙書敬勇祠記

祠為勦徭寇死事者作廣東按察副使鬱林陶魯撰記
成化十五年己亥十月望日知縣丁積指揮同知倪麟
立石太學生邑人陳獻章書丹此碑內書隣為隣然則
粵中俗字雖前賢亦不免耶

白沙壯哉亭碑

敬勇祠後最高處作亭以為臨眺之所章以壯哉并題
其上詩五絕二首宏治元年春閏正月庚午翰林國史
檢討陳獻章閱丁酉舊稿書以遺守祠者

陳白沙弔莊節婦墓詩碑

吳村里弔莊節婦墓邑人陳獻章二詩寧都丁積一詩

後有成化二十二年丙午春正月乙亥守墓人古岡容
貫識皆白沙行書

白沙書游心樓記

記是林光緝熙撰而先生書之成化十八年壬寅二月
也碑首有八分書游心樓歸趣六字末題云東海居士
隸古下有古岡陳獻章江浦莊景五羊張詡三人詩
新會又有白沙書敬義二字碑字連一尺五寸許成化
辛丑夏五月知縣丁積命工勒石
新會又有白沙石刻三種皆長條幅
其一有客曾過世壽堂云七律一首公甫題筆勢飛

動

其一植竹為垣土作臺七絕一首無款
其一忍字贊上大書忍字下書贊語七情之發惟怒為
遽衆逆之加惟忍為是絕情實難處逆非易當怒火炎
以忍水制忍之又忍愈忍愈厲過一百忍為張公藝不
亂大謀其乃有濟如其不忍傾敗立至宏治丁巳夏五
月石翁書

白沙先生改葬墓碑銘

嘉靖二十八年二月賜進士出身資政大夫前南京兵
部尚書奉勅參贊機務國子祭酒翰林侍讀同修國史

經筵講官門人八十四甘泉生湛若水撰并重書
嘉會樓記

樓在新會縣東南二十里許宏治甲寅夏建按熊成章
為白沙建宏治十六年秋南海病夫張詡廷實撰并書
詡白沙門人此碑筆法宛然白沙所書

二碑皆在新會之江門樓址已不可辨獨碑尚橫塍間
方網於庚寅秋檄有司俾作亭覆之

江門白沙故里在新會縣城東所謂黃雲紫水間也舊
有尋樂齋春陽臺今皆圯白沙祠後有碧玉樓以貯先
生受徵聘之碧玉玉高六寸二分濶一寸二分厚二分

無銘識

湛文簡增城縣儒學明倫堂頌

邑庠師廖君如嵩崔君時敏重修明倫堂遣諸生黎鰲
頌士嘉黎化來請銘予曰頌也為述所聞書于堂壁以
告來裔其詞曰天佑斯文萬生聖人維聖有作明倫肇
新明倫之堂翼彼相江鳳山之陰龜峰之陽曷明曷倫
先明諸心匪行匪習由仁義行於變時雍五典克從曷
從以變萬心攸同此何以然人心即天又何以然天無
二原痛癢相關泚顙汗顏赤子入井誰不惕焉親義序
別信由心生非由外鑠天靈天真父子生親君臣生義

序別信生夫婦友第道在感應萬一各正其幾其微哲
哉亞聖知幾哲人知幾其神盡心盡性盡性盡倫萬古
在後千古在前誰不同天誰不同然敢告髦士同體斯
義乃升斯堂德業不匱賜進士出身資政大夫前南京
兵部尚書奉勅叅贊機務國子祭酒翰林侍讀同修國
史經筵講官賜一品服湛若水書嘉靖二十四年六月
吉知縣事何天祿主簿凌友庠立石字行艸徑六七寸
增城一石刻石翁分付釣臺詩有序達摩西來傳衣為
信江門釣臺亦老夫之衣鉢也茲以付民澤棗叔管將
來有無窮之祝珍重皇王帝伯都歸盡雪月風花

未了吟莫道金針不傳与江門風月釣臺深久坐江門
不算年蒲袒當膝幾回穿如今老去還分付不賣區區
敝帚錢若水謹錄又刻于忍亭詩書付孫潤先刻石昨
宵有好言喜我潤孫賢公藝百忍字吾且至千馬鴻爐
鍛頑鐵千鍊千精堅自茲化有容習慣成自然猶聞忍
禪師引蟲啣其肩忘已不有身何物橫吾前鏡石告後
裔遵此無尤愆嘉靖三十三年甲寅九月廿有八日八
十九甘泉翁書

黎瑤石書從化三箴

從化縣堂清慎勤三箴碑立於嘉靖庚戌少詹黃佐撰

門人黎民表八分書書與箴皆穩重不佻又從化縣尹
呂侯去思碑亦瑤石八分書

瑤石書最有名真州篆隸皆善嘗於德慶錦石山書華
表石三字大徑丈餘山高竟不可拓

從化尚有瑤石書櫺星門戟門二記字並不佳豈刻手
拙耶 粵之八分黎瑤石以方整勝尚有停雲筆意虧
湛若以八分擅名而今石刻絕少若陳元孝八分書頗
入流宕未為近古惠州府學官重修記是元孝八分也

此卷已刻完將成帙矣辛卯十月四日得新安宰李南
礪文藤書拓寄縣南零丁洋赤灣天后廟碑一通其額

古篆重建天妃廟後殿記八字文八分書有夏承碑遺
意天順七年春正月望後三日蘭坡黃諫書亟著于錄
而十郡州邑似此江灣島側未經按剔者尚更不知凡
幾安得盡如南礪者好而聚之乎時將受代卜移住育
賢坊摩澤曜石挑燈記此

粵東金石略卷第二

廣州府金石二

南海神廟碑

南海神廣利王廟碑使持節袁州諸軍事守袁州刺史

韓愈撰使持節循州諸軍事守循州刺史陳諫書王象之碑目云

并篆額元和十五年十月一日建按碑稱元和十二年詔用

前尚書右丞國子祭酒魯國孔公為廣州刺史至州之

明年將夏祝冊自京師至云云明年祀歸又廣廟宮而

大之明年其時公又固淫咸願刺廟石以著厥美是碑

作于十五年無疑而廣州志以為十二年所作誤也廣

州志又以此碑為宋循州刺史陳諫重書今碑並無重書字宋時職官無刺史之名而陳諫係于唐時為循州刺史又于元和初刺封州則碑為當時所書無疑矣纂志者或以為韓公雄文宜出韓自書不知是年之春公已到袁州九月召拜國子祭酒冬暮至京師碑中所云明年其時者乃指立夏氣至之時是碑蓋在袁州作也碑尾云十月一日建則書字于石時公去粵已久矣

又按鄭氏通志金石略載隋唐碑於歐虞等以書名者並分別其人於後而以所書之碑類次記之其叙陳諫

書凡二種

廣州南海神廟碑昭義軍節度使辛秘碑

次於韋縱之後唐元度之前

則陳諫在當時以書名而今知之尚賴有此碑耳奈何撰廣州志者誣以為宋人哉

此碑書字尚有晉人遺意在殿側東廊歐陽公集古錄云以余家舊藏集本校之皆同惟集本云蜿、蛇、而碑云蜿、蛇、小異當以碑為正

碑陰凡四段

最上一段熙寧歲次癸丑十二月丙申距甲寅六月辛未府帥諫議程公凡四謁南海廣利昭順王蓋將天子之命求雨於神而兩禱兩謝之獲應頗異前太守有一至廟下已二十餘年而後寂寥無傳今公戾止何其偉

欽亦足為靈宮一時之盛事資邦人百年之美談也時
獻官黃植趙光弼攝奉禮黎獻臣攝大祝富臨輒記於
退之之碑陰云公之子德叟義叟陪位

第二段皇祐二年孟秋庚寅偕陸仲息子強丁寶臣元
珍李徽之休甫王逢會之劉竦子上謁廣利王夕宿廟
下祖無擇擇之記彈琴道士何可從鏤字僧宗淨同行
後小字云吉陵蕭可相同男洪濤于万歷丙申九月建
醮三年己亥九月又申懺謝題記

第三段中云宗道從事於廣并今三拜祠下熙寧壬子
三月權發遣轉運使公事向宗道題 左云明萬歷己

丑冬郡人劉克修克治克平徐明遠謁祠下陟童邱登
西臺信道士省玄許後八分書四小字云朱完後至
右云嘉靖二十九年仲春丙午黃佐才伯偕門人徐兆
先履漸黎民表惟敬梁孜舜伯伏謁廟下謹題

第四段端平丙申三月清江彭鉉詣祠歲祀事登浴日
亭訪韓碑誦坡句摹本而歸刻名碑陰時廬山胡泳与
其季泓偕行

碑左側

儒以嘉靖壬午莅官寔領嶺東徃來海道多賴神祐茲
挈家還山敬謁祠下告行歲丙戌三月廣東按察司副

使吳興施儒聘之題名

碑右側

萬曆癸巳四月八日瓊臺王弘誨紹傳偕文學梁紹裘少仲鍾昌辰維樞門人翟繩祖從先梁子壽伯遐揚惟忠茂英遊羅浮拜謁祠下題名碑石長子汝龍壻黃廉侍

宋開寶南海神廟碑

在廟門內西側北向正書篆額大宋新修南海廣利王廟碑銘并序山南西道節度掌書記將仕郎守右補闕柱國賜緋魚袋臣裴麗澤奉敕撰朝議郎行監察御史

權知端州軍州事臣韓溥奉敕書開寶六年太歲癸酉十月九日己丑書建其文略謂天寶十載封為廣利王自唐季戎馬生郊竊號假名憑深恃險五嶺外郡遂為劉氏所據殆七十年何暇禱祀嶽瀆耶今皇帝受命蠱茲炎阻獨迷聲教阻絕我琛賁割剝我生民恣為淫刑濫行不道乃出兵命將王師如時雨之降徧海岱而曾匪崇朝渡南溟而止期一息韶廣之壘今已平矣下郡百餘所拓土千萬里沿海舊地盡為我有未翌日廣南道行營招討都部署潘美陳露布俘偽廣主與官屬獻于闕下上曰廣利王廟自阻隔以來寥寥莫睹可俾重

葺乃命中使汪巖其事云云

碑陰列銜

推誠宣力同德翊戴功臣山南東道節度襄均房復等
州觀察處置兼三司水路發運橋道等使南面行營兵
馬部署廣南諸州計度轉運使權知廣州軍府事市舶
使金紫光祿大夫檢校太保使持節襄州諸軍事襄州
刺史兼御史大夫上柱國滎陽郡開國侯食邑二千戶
食實封二百戶潘美 推誠翊戴宣力功臣金紫光祿
大夫檢校太保使持節復州諸軍事復州刺史本州防
禦使南面行營兵馬都監兼御史大夫上柱國沛郡開

國公食邑二千五百戶朱憲 推誠翊戴功臣起復正

議大夫秘書少監使持節韶州諸軍事韶州刺史廣南

諸州轉運副使柱國瑯琊縣開國男食邑三百戶賜紫

金魚袋王明 都大提舉修廟中散大夫行尚書駕部

員外郎通判廣州軍府事兼市舶判官柱國謝處珙

奉敕監修廟文林郎守廣州錄事參軍事林洵美

此段在左方小字作五長行

又碑陰題名凡三段

熙寧七年秋八月上以久旱精禱天下名山大川詔右
諫議大夫知廣州程公致祠南海洪聖廣利昭順王已

而休應云獲復命公行賽謝之禮時黃稹趙光弼為獻
官黎獻臣譚粹攝奉禮太祝陳端與公之子德叟義叟
陪位冬十月十八日蘇咸記李種書此段在額

聖宗皇祐辛卯歲三月十九日庚午立夏祇命致享于

洪聖廣利王廟右諫議大夫充天章閣待制知廣州田

瑜都官負外郎前監鹽倉黃鑄虞部員外郎通判朱顯

之謹題僧宗淨刊 此段在中之右字大三寸有餘

熙寧甲寅仲春十九日府幕譚粹檢季邑簿李種書碑

謁拜祠下此段在下方

乾隆丙戌九月大興翁方綱謁祠觀碑辛卯三月大

風雨中復來題記

紹興乙丑六侯碑

六侯者達奚司空封助利侯杜公司空封助威侯延海
曹將軍濟應侯延海提點使順應侯王子一郎輔靈侯
王子二郎贊寧侯皆著靈應於海上者紹興乙丑中夏
廿四日莆陽方漸紀于石 此碑在康定二年中書門
下牒碑之陰

乾道元年碑

額篆云南海廣利洪聖昭順威顯王記
文正書左朝奉郎權發遣南恩州軍州主管等事兼管

內勸農事借紫陳豐撰右朝奉大夫提舉廣南路鹽事
廣東常平茶事賜紫金魚袋詹彥書左承議郎權發遣
廣南東路轉運判官兼提舉學事芮燧篆額乾道元年
十月二十五日右朝請大夫直敷文閣權發遣廣州軍
州主管學事兼管內勸農事主管廣南東路經略安撫
司公事馬步軍都總管賜紫金魚袋陳輝立石

一段記刻
石始末

至正戊子脩祠詩碑

至正戊子冬至日典瑞院照磨河南王按彈溥化被命
脩理南海王祠偶成一律并書

乾道重修碑

正面文十二行行書乾道□年閏七月庚辰落成洛師
康与之記并書碑陰文二十行楷書乾道丁亥冬十月
初六日經始凡八十二日而告成是歲十二月□□崇
道觀康顯記并書

宋寶慶重修碑

寶慶元年七月十五日朝議大夫廣南東路轉運判官
義溪曾噩記奉議郎充廣南東路經略安撫司主管機
宜文字清源留元崇書

洪武二年重修碑閩中徐宏撰

成化己丑重修碑承直郎余志撰

崇禎八年南海神廟記巡按葉紹顯撰

南海神廟遣祭冊文石刻併記於左

唐張九皋祭冊碑今已復齋碑錄唐張九皋祭南海冊天寶十載三月刻

宋康定二年十一月中書門下牒

右諫議大夫叅知政事王

右諫議大夫叅知政事晁

戶部侍郎平章事章

右僕射兼門下侍郎平章事已上四行在碑之上方

承奉郎似是權字知觀似是察字以下不可辨

節度推官承奉郎

宣德郎試秘書省校書郎權節度掌書記章

朝奉郎尚書都官員外郎通判軍州兼勾當市舶司及

管內勸農事上騎都尉借緋謝

朝奉郎尚書都官員外郎通判軍州兼勾當市舶司及

管內勸農事輕車都尉賜緋魚袋□

廣南東路諸州水陸計度轉運使兼提點市舶司本路

勸農使朝奉郎守尚書主客郎中兼權發遣軍州事護

軍賜紫金魚袋馬

慶曆二年二月十七日上石

承務郎守錄事參軍陸賁書并篆額

皇祐五年牒

中書門下牒廣州南海洪聖廣利王牒奉敕易載害盈
益謙之旨蓋神道正直必有輔於教也其有陰相吾民
沮遏凶醜應答明白不列美稱曷以揚神之休南海洪
聖廣利王惟王廟食尊爵表于炎區年既遠矣唐韓愈
記稱神次最貴且有福禍之驗國家秩禮祀等尤高康
定中朕嘗增王徽名牲幣器數固不稱是今轉運使絳
言迺者儂獠狂悖暴集三水中流颶起舟留三日逮至
城闔廣已守備火攻甚急大風還燄閉關渴飲澍雨而

足變怪妻見賊懼西遯州人咸曰王其恤我者邪朕念
顯靈佑順靡德不酬其加王以昭順之弭神其歆茲顯
寵萬有千載永庇南服宜特封南海洪聖廣利昭順王
仍令本州差官泚彼嚴潔致祭及仰製造牌額安掛牒
至准敕故牒

皇祐五年六月二十七日牒

下層元絳記云上心感焉台詞
臣蔡襄作誥故全載其文於此

工部侍郎參知政事劉

給事中參知政事梁

戶部侍郎平章事龐

碑凡三層此其上一層也第二層載皇祐五年四月十

九日廣南東路諸州水陸計度轉運使兼提點市舶司
本路勸農使朝奉郎尚書工部郎中直集賢院上騎都
尉賜緋魚袋借紫臣元絳狀奏文凡二十三行

下一層刻至和元年歲在敦祥十二月二十一日庚戌
絳謹記始興李直書丹

此碑即尚書省牒碑之北面

慶元四年尚書省牒

禮部狀擬賜廟額降勅凡小字十二行

牒奉勅宜賜英護廟為額牒至準勅故牒

右十六寧大州書

慶元四年五月尚書省印牒

叅知政事何

叅知政事謝

右丞相

右銜姓并為一長行皆大州書

元至元癸巳中奉大夫御史臺侍御史鄭制宜侍儀司承

奉班都知楊彌堅承務郎廣南東路儒學提舉王獻記

從祭官奉議大夫同知廣東道宣慰使司事奧屯希尹朝

列大夫廣東道宣慰副使薛元禎廣州路儒學教授陳黃

裳書

延祐七年祀海記 篆額

與祭官中奉大夫廣東道宣慰使都元帥耶元謙

監祭官承直郎海北廣東道肅政廉訪司經歷完顏謙

延祐七年六月日立石

碑右側皇祐三年冬十月己卯祖無擇李樞李徽之田

聿柳淇題

宋人題名不知何以在元碑之側而字法甚峭整恐非後人所能作實不可解

泰定四年近侍火兒赤黃頭天倪體真明玄大師中嶽廟

住持提點玄門諸路道教所較錄曹德仁

廣州路儒學教授呂弘道記

此記在延祐七年祀海記碑陰篆額

泰定甲子承德郎御位下必閣赤倬思監御位下舍里別

赤承德郎崇福院經歷畢禮亞 廣州路儒學教授陳性

存撰文廣州路提控案牘兼照磨承發架閣連文質書

大德十一年近侍必閣赤姦怯里馬赤懸 廣州路儒學

學正權管學事劉光遠記并書

至元丙子近侍速古兒赤脫火赤承務郎管領諸路怯怱

口總管府經歷蘓樞 廣州路儒學教授劉本記葛元鼎

篆額并書

至正十年秘書監卿月魯不花翰林待制楊舟 舟自為記

至正十一年大司農少卿王敬方翰林脩撰朝請大夫唐

兀安僧

至正乙未承事郎太府監右藏庫使三寶奴翰林脩撰承
務郎牛繼志 繼志自為記南安路道源書院山長黃異

書丹 八分書 碑陰大字通 鮮不可視

明洪武二年廣東衛指揮使胡通

洪熙元年太常寺丞孔克準

宣德十年廣東布政司盧玉潤

天順元年翰林院編修尹直

景泰五年吏科都給事中林聰

景泰六年都察院右都御史馬昂

正統九年禮科給事中章瑾

成化元年富陽伯李輿

成化四年巡撫陳濂

成化十三年巡撫朱英

成化二十年巡撫朱英

宏治元年平鄉伯陳信

宏治六年都察院右都御史閔珪

正德元年工科都給事中王縝

正德六年廣東布政司羅榮

正德七年巡撫林廷選

嘉靖十一年廣州同知沈尚經

嘉靖十七年欽差道士周大同
萬曆十六年巡察廣東蔡夢說

國朝順治八年四月七日翰林院提督四譯館太常寺少卿

孫廷銓

康熙六年八月十七日都察院左副都御史董萬行

康熙二十一年五月廿日禮部左侍郎兼翰林院學士楊

正中

康熙二十四年二月十日詹事府少詹兼翰林院侍講學

士王士正

南來志云先是順治中告祭者一
康熙中告祭者三至是凡四遣云

康熙二十七年十二月十七日承宣布政使司張建績

康熙三十五年正月二十七日詹事府少詹兼翰林院侍

講學士李錄子

康熙三十六年八月三日都察院左副都御史熊一瀟

康熙四十二年四月十日戶部右侍郎范承烈

康熙四十八年六月念七日詹事府少詹事兼翰林院侍

講學士史夔

康熙五十二年七月朔日都統馬雲霄

康熙五十八年孟夏月辛酉日翰林院侍講學士李紱

雍正三年五月十二日廣東撫院牟希堯

乾隆元年正月二十八日詹事府少詹兼吏部文選清吏

司郎中行走福什寶

乾隆十三年六月十九日廣東布政司恭慶

乾隆二十年九月兵部右侍郎李清芳

乾隆二十五年二月十六日講起居注官教習庶吉

士詹事府少詹德爾泰

寶副憲一碑尚未勒

蘇文忠浴日亭詩

石刻在亭內下半微泐題云南海浴日亭題下有小字

四行云至元十八年十月一日其餘不可辨細視其尾

似云軍都元帥廣東□□使白□書檢廣州志元至元

中有宣慰使白佐豈其人欤詩後跋云右紹聖初元東

坡先生謫惠州過浴日亭所作也壁間今存小刻乃後

人所書缺二字有舛異筠舊得此真蹟於湘中嘉定辛巳立

夏祇奉皇帝缺二字上一字似是祝來謁祠下曰出以壽諸石缺一補三字

蓋斯亭觀覽之偉固自足以雄視海天而此詩詞翰之

神尤足以彈壓千古缺二字可缺二字其缺數字無傳也哉清源留筠

端父書筠正之次子也嘉定十二年知廣州府詩第

七句忽驚鳥動行人起鳥石刻作馬字頗完好非利泐

致誤也殊不可曉

陳白沙次浴日亭韻詩

在蘇詩碑陰草書浴日亭追次東坡韻殘月無光水拍
 天漁舟數點落前灣赤騰空洞昨宵日翠展蒼茫何處
 山頽影未須悲鶴髮負暄可以獻龍顏誰能手抱陽和
 去散八千巖萬壑間成化乙巳夏四月望後翰林國史
 檢討古岡病夫陳獻章書後有湛文簡跋云此吾師石
 翁先生手書浴日亭和東坡之作也識者以為度越前
 作矣夫以先生片言隻字皆發於妙道精義之蘊可以
 為訓又非特詩人墨客之比已也此本嘗刻于關大正
 氏而藏于道士馬字缺三曰李鰲峰別駕以示予余久欲書
 此詩刻于亭中而未能一旦得字缺二珠之入手也遂俾善

書者承差洗瀚精摹入石鑿于亭上嘉靖壬寅秋七月

二十四日門人前南京兵部尚書甘泉生湛若水謹書

乾隆辛卯三月大興翁方綱風雨中來摩挲碑刻賦詩而去

閩人王命璿入春三日登浴日亭次韻三衢徐文溥嘉

靖甲申孟秋次韻各一按廣州志王萬歷四十五年任按察又宏

治三年秋八月十有二日賜甲申進士嘉議大夫廣東

按察使山陰薛綱蓬字韵七律一首三碑字皆佳又有

萬歷辛丑貴陽李時華次韻詩

南海神廟銅鼓舊聞內有陽識漢伏波將軍所鑄七字
 載於廣東新語漁洋先生皇華紀聞亦云下有款識未

及觀此鼓重大道人頗以啓視為難果有之當為粵中金石文第一昔每過茲廟輒以不一啓視為憾辛卯六月自東郡按試歸適值修廟語道士徑啓視之則其內光潔無一字信乎紀載之不足憑也鼓二皆在殿中東大西小大者面徑三尺五寸五分高一尺九寸六分小者面徑二尺八寸三分高一尺二寸昔人所記謂小者殺大者五之一誤也小者腹尚微廓腹下乃縮至大者則面較鼓身四邊寬出寸許腹漸縮下又漸廓朱竹垞謂鼓穹腰錔削下蓋取二器折衷之此言良是昔人所記槩以為上廓下殺誤也大者面腹周以雷紋面綴六

鼉相傳鼉為番人取古今其跡猶在昔人所記面綴兩鼉或又謂小者四角金蝦蟆五為番人所竊皆誤也大者其面一邊鑿缺兩旁各有兩耳穿以四索色青光可鑑小者製同耳較小面紋已模糊下亦剝缺所謂鷓鴣

斑八卦畫者不甚可辨矣

高州關帝廟銅鼓面徑三尺無款識

銅柱之字人無知者攷之傳記水經注云馬文淵建金標為南極之界林邑記云建武十九年馬援植兩銅柱于象林南界與西屠國今漢之南疆銘之曰銅柱折交趾滅交趾人至今怖畏有守銅柱戶數家歲時以土培之僅露五六尺許道里記云林邑大浦口有五銅柱水

經注言銅柱在林邑其在欽江者唐節度馬總所植也
按史元和中馬總為安南都護立二銅柱於漢故處鏡
著唐德廣東新語云馬援所立於林邑則今茅嶺銅柱
必馬總之遺也據此則今茅嶺銅柱又當有唐刻字矣
嶺在欽州西三百里州志云在州治之西貼浪都古森
崗明萬曆間有貼浪崗民曾至今茅嶺親見之嶺上茅
南北分披嶺去銅柱半里許交人年一以上培之今高
不滿丈大不知幾許柱上字蹟莫識問其路所由則曰
自貼浪扶隆行七日至八尺石橋尚行八日方抵其處
云

粵東金石略卷第二終

粵東金石略卷第三

廣州府金石三

清遠峽山寺諸刻

禺峽山志云期雲館石壁刻至和乙未正月甲子武林
元絳行部過此此石刻久已不存今寺中有石刻一段
剝泐之甚惟露重開生面四大字後題一行隱隱不可
辨識惟一元字略可見寺僧云即元絳筆也按元厚之
熙寧元年知廣州又任轉運使

管東坡過此寺謂溪水太峻當少留之於宗碧軒之北
作一小閘渚為澄潭使人過閘上雷吼雪濺為往來之

奇觀若夏秋水暴可為啓閉之節用陰陽家說寺當少
富僧如公言為之即今飛泉亭處也予去年大雨後於
此觀瀑見亭右石壁高處隱隱有字寺僧指為坡蹟曰
賦詩云攝衣步層石一路吹松風迺訪坡公蹟綠蘚纏
蛟龍云磨墨州書勒石於亭壁今夏重来拂拭苔蘚
推拓出之乃坡仙遊寓四字非坡書也字八分橫書亦
古雅後題朱學熙蓋即朱所書耳寺僧語予舊有坡書
一碑云東坡居士渡海北還吳子野何崇道穎堂通三
長老黃明達李公弼林子中自番禺追錢至清遠峽同
遊廣陵寺元符三年十一月十五日此碑久失曰併著

於此不可以予詩而傳會公字也

按此條本集在廣慶寺乾隆辛卯七月方網集公書補刻於飛

泉亭

豫章黃州教自廣東轉運判官蒙恩移使湖南政和丁
酉三月乙卯舟過峽山寺與天台僧子常同遊男彬林
壑彪攀侍行知清遠縣事廉仕俊命工刊此段在雲
經二字下左側其文自後而前

寺西有石高數仞濶十餘步云管葛稚川脩煉於此名
曰葛壇石石上橫書葛壇二大字後題乾道己丑孟秋
吳興陶定安世書此刻蒼古俊逸與北海石室記後題
名一行筆勢無二

廣州路清遠縣峽山廣慶禪寺新建飛來殿記天歷二年良月既望將仕郎廣州路清遠縣尹兼勸農事楊觀記并書當代住持僧明顏等立石

行楷刻一段云峽山寺自吾蜀蘇長公紀勝迄今垂五

百字御史江字以事字出廷按察使字遊於此亦皆蜀

人也曰鑄石以著歲月云正德庚午歲重陽前三日清

遠縣知縣張字督工刻

琴心閣後石壁上刻雲壑二字八分書後題虞臣二楷

字

又青巖泉偕樂薪木勿傷八字刻題云萬曆庚子仲春

南海陶虞臣題

飛泉亭下橋底石澗深處澄潭晚沐四字徑尺許陶虞臣篆書

仙源洞瀑布發源處也有八分橫書仙源二字刻云明

萬曆庚申秋朱學熙題其下石壁上又有橫篆移情二

字不著名氏漁洋南來志云中碧軒後巨石林立有前人摩崖探源二字似即此地而探源之字未見中碧軒即淙碧軒也

水簾臺中有大篆二處曰層崖飛雪曰天風環珮款云

山中人朱學熙題

卧仙岩在瀑布左懸石丈許如覆深半之中平坦皆有

仙人卧此聽瀑故名石下刻卧仙岩三字八分橫書亦

朱學熙筆

又一石亦八分書爾翩二爾僂二萬斯年朱學熙
一石刻行楷云崖石勢欲落令人發怪想載拜濡元雲
顏之衣裾上朱學熙

一石刻楷書闢蒼雪崖曰題云萬木蔭蒼瑤千山澗寒
碧願洒向人間一時清火宅朱學熙

浴日亭右側壁上朱學熙所篆蒼瑤二大字直書

寺東江泝溪石上浴夢二大字八分橫書後題曰山中
人下有朱學熙印

海翁巖前有達摩石澗丈許梁時達摩西來經此於石

上禪定其下有八分直書石禪二字下題朱對子三字 寺

志云山中朱對子狂士也嘗備闢杜禹諸勝所封花
阡有學熙銘學熙明邑文學

釣鯉臺頂刻奇觀二篆字抱朴亭後石上刻盟玉二篆
字俱對子書

此下臨江一石篆刻東坡釣磯四大字石為江水所浸
水盛則不見予五至而後拓得之

標社下石壁上玉洞瑤天四篆字刻題云山中朱對
子熙

蒼雪崖三大字八分橫書刻題朱學熙闢陳長策書

雲巢之右路側石上刻隸書發怪想三大字旁刻楷云
釋文發怪想曾哲後隸又嘯臺後有石平行如席舊傳
仙人聚飲于此刻瑶席二隸字末題云曾哲後為朱村
子隸八字亦帶篆意

海翁巖前大石上刻艸書一詩凌空飛錫結嶙峋蒼藓
香中艸自春鳥度雲移今此世鴻冥天濶我何人義娥
斷送千年夢龍象終成一聚塵便合拈花發微笑滄波
無語月華新泰泉黃佐

艸書飛泉洞詩五津四首萬曆辛丑重陽邑人鍾萬春
題後學陳遠馨謹書上石

半雲亭用

字缺

郢州詩五律六韻字亦古拙有致後一行

作者姓名已不可辨半雲亭即半山亭也

談徑石後行書海翁巖三字康熙癸巳六月邑令孫繩
祖鐫又櫟社下石壁有行艸海濶天空四字亦繩祖所
鐫廣州府志以為唐刻誤也

寺內又有古菴巖邁篆刻不可確三字臨高令樊庶楷
刻江都樊庶聽泉處七字又有楷書太原郭仲元累至
此八字又雲根二篆字櫟社二楷字初得洞路由此六
楷字息趺二行楷字俱不著名氏

山頂飛來寺所稱飛來古寺也有明人所書石榜第十

弄道人探泉飲驚□蛟龍夢傍小注栢山張奩□詩字
約二寸半

其南九龍洞上有明太史甘泉湛先生寓墓十字左傍
小字正德庚辰十二月十二日右傍小注兀厓子吏部
霍韜題對面有柱笏臺三大字

其南紫姑峯寺邊村側有寶峯勝處橫書四大字字迺
二尺五寸長三尺三寸傍小注甘學書古岡鄧南鳳立一
峯下舊有霍公書院今廢無碑記後有墓一區墓碑上
截大書皇帝諭葬四字下書涓厓霍公夫人區氏墓嘉
靖二十一年歲次壬寅正月朔旦欽差工部郎中顏德

倫布政司叅議徐九皋造一峯下明西莊霍公墓墓碑
誥命二道嘉靖七年五月十六日謹身殿大學士張孚
敬錄其右有神道碑湛若水撰李時書丹方獻夫題額
其左有墓表湛若水撰玉泉甘學于盤書又祭文碑四
無書人姓名

其西雲路村前有仆碑二一碑遊樵詩四首并序方歷
七年寧澹居士南海縣知縣周文卿刻石云發順德宿
西樵明旦登馬山中有村桑麻雞犬居然別一天也予
登絕頂望遠海俯長江一覽八表不知天地之大而吾
身之小也南海多仙山此山仙獨早根托蛟龍窟翠抱

□壺島雲入天際青人歸塵外好誰為隱者招吾欲從
之老其昨宵弄明月青樓收□處今夜明月同西樵山
下樹其□上西樵山不見西樵者敲殘洞口棋柯攔何
年把其愛山之一登可愛山不捨穿來刺繡衣欲脫西
岩下甚一大科峯見日臺記萬曆二十三年乙未六月
二十六日立南海霍尚守撰又村口有明李子子長先
生墓表銘南海霍韜撰南海陳中誠元白書丹番禺甘
學于盤題額嘉靖十年十一月十日
其西白雲洞三大字字寬約尺一二寸長約尺六七寸
下橫刻云再遊白雲洞何君載酒于雲□念白雲主人

先□何子□已逝舊讀書處在雲室石梯漆梁屏榻□
在而雲堂觀音像則新剏也悵然有感賦此先友何子
明曾此著潛夫朝見白雲悅夕與白雲俱子明不可作
其人孔氏徒暇日追前遊風高情興孤飛泉洒絕壁幽
賞入蓬壺寄語遊樵者青樽宜此娛佛自西方來人異
教亦殊千載□□意語默與相孚萬曆己卯菊月下澣
白鷺主人常憲文識□孫何元幹重刻其下橫刻白雲
洞銘白雲古洞誰哉闢始觀察何公嘉靖初紀子亮治
之隆慶辛未剔出發潛泉石之光崇德德志山高源長
中憲龐子銘告四方雲南曲靖府知府□厓龐嵩撰雲

岩守者何元幹刻其傍丈許又橫刻一段陟彼白雲徑
□滿白雲時□與白雲跡心與白雲期陟彼白雲洞□
□白雲迷跳出白雲□身與白雲齊鐵橋主人梁嶠□
山氏州洞中又有一小岩有何白雲先生讀書處八字
無書人姓名

其東北飯蓋峯頂有仰辰臺三大字字約長三尺五寸
寬三尺五寸傍小注嘉靖丙子甘泉若水書又傍一石
刻字一段其石險絕不可上

其北地名珠坑石上刻玉岩二字字寬約七寸長約八
寸無書人姓名相傳亦方獻夫書

粵東金石略卷第三終

粵東金石略卷第四

韶州府金石一

南漢大寶二年鐘款

鐘高二尺四寸圍四尺口五尺紐高五寸圍二尺款曰

粵維大寶二年太歲己未七月甲辰十九日壬戌樂昌

黃蓮山寶林禪院住持長老明徽大師賜紫沙門義初

名衆緣鑄造銅鍾一口重四百斤勸首弟子給事郎守

內侍省內府局令都監樂昌防遏諸都并監樂昌縣事

賜紫金魚袋鄭敬贊以七月廿八日設齋慶讚永充供

養背款云奉敕鑄題黃蓮山銅鍾一口

明曲江鄧維濬作古鐘
記載此文割裂不全

凡鑄金之文陽識易成陰款難鑄三代銅器用陰款秦漢則多用陽識竹垞跋晉祠鐵人胸前字謂金石之文石多金少款多識少此猶是通指金石刻而言之若但以金論則識多款少也此文乃是陰款尤為難得故拓而存之雖字體天斜不工亦不恤燕人市馬骨之誦也此鐘不知何時移於韶州府學明倫堂問之學官皆不知予親至堂上摩挲藥銑始得讀而拓之又聞東莞縣東脩慧院有南漢大寶三年內承宣使劉廷威鑄鐘二百五十斤永樂間為盜竊去

乾道三年鐘識

在韶州府堂識云昔乾道三年歲次丁亥壬子月初一日乙丑勅差住持傳法賜紫正覺了悟大師奉寧謹題隆興府都料游智文造

韶州府解有明萬歷間知府陳大綸所造銅漏壺止存其一上有大綸識

宋政和手詔碑

碑在韶州府學凡二層其額大書御筆手詔四字上一層云朕承祖宗遺休餘烈崇經術設學校興賢能以待天下之士高爵重祿承之庸之以待士之任官者蓋与之脩政事理人民以立太平之基致唐虞三代之

隆宜有豪傑特立之材忠信志義之人比肩相望焜耀
 一時為世盛事而比年以來懷僭亂之異謀干殊死之
 極憲者如趙諗儲侔王案劉昂之徒或賢科異等勲閥
 世胄或出入禁闥侍從之領袖為搢紳士大夫之大辱
 間巷無知愚夫愚婦之所憤疾武夫悍卒未嘗知書者
 咸羞道而喜攻之其故何也豈利心勝而義不足以動
 之欤抑勸導率勵之方有所未至欤夫經傳所載君臣
 之分忠義之訓榮辱禍福之戒豈不深切著明今誦其
 言而不能効之行事深慮薄俗浸漬士風陵夷失崇養
 之指害教化之原為天下後世笑卿當師儒之任以學
 行致大官其思所以勸勵興起畀知尊君親上之美無
 復暴戾邪僻之行以居德而善俗以化天下與後世稱
 朕意焉故茲詔示奉行無怠

付李邦彥御書
出寶

下一層云政和八年夏六月上親御翰墨作訓于四方
 多士以其詔屬臣邦彥使奉行之秋七月被旨揭示于
 太學暨辟廱仍著之石九月臣以職事進對便朝上諭
 臣曰前日詔書學者宜識所以訓迪之意且暴戾邪僻
 豈士人所為臣頓首謝曰陛下興學造士澤之入人深
 矣孰不能惠上德而化之聖詔一頒鼓舞丕應咸目喻

而心成咨嗟誦詠者不可一二數憤激而勸以義者慨然相先也蓋教育之道素明而理義之感人若是其敏願詔儒臣作記以揚厲休蹟俾天下後世無忘其章越二日御筆委臣識之而臣䟽遯一介擢長師儒毫髮未報宸翰所及獎飾踰分眷任之意不替益專且不以燕累取玷上寵俾加序述惟是不腆末學固不足以辱命而載名其下有榮耀焉臣之幸也謹拜手稽首而言曰臣聞三代之學皆所以明人倫人倫治化之本義命之大戒存焉士之所學學此者也上之所教教此者也政事之興風俗之醇皆原於此周監二代禮樂庶事備矣

而教養之法加詳法象所示雲漢其章人才之成金玉其質拔竒取異序爵而官使之名正分辨咸懋嘉德故服事其上而下無覬覦羔羊節儉正直之風有辭于永世知所以尊義而立命故也治降時末君臣信義之論策名委質責辟之責猶行於區區戰國之間時以為美談豈餘波遺澤燕及來葉而人倫之教在人心者未熄耶上以神明淵懿之質發揮前聖光大之烈勵賢崇化一本於學所以風天下而善萬世者三代不足進也邪謀弗臧既庶于憲而訓辭諄切必勤勤于庠序師儒之官宸慮所圖至深且遠矣譬猶慶霄清明白日中照有

日有趾者待是焉傾非甚愚孰不知嚮是宜草心滌慮
祇奉明德戒懼而不敢少易也嗚呼士之取重於世者
以義命在我物無得而移之故尊君親上之心常存而
不喪嗜逐末者義以利勝樂干時者命以故滅陵夷漸
漬始失其常心越乃誕作狂僭矯誣之行而階之為禍
屢校之施金柅之戒罔不在厥初則天心仁愛之篤形
于詔諭其為惠可勝既耶書曰王言惟作命不言臣下
罔攸稟令夫以九重之近幹制四海之遠德意志慮非
言弗宣稟令之臣所當奉以周旋靡遑夙夜矧奎章洛
畫昭布于上下而又勒諸翠琰垂範將來頌疇敢不力

臣績文未工愧無以形容聖作之萬一然戒告之嚴委
寄之重尚俾來者勿怠于成以奉揚丕顯休命於億萬
斯年之永則是記也豈特侈上之賜使後世歆豔其美
而已哉冬十月己卯朔十五日癸巳朝議大夫試大司
成同修國史隴西縣開國子食邑五百戶賜紫金魚袋
臣李邦彥奉御筆記并書保和殿直學士朝請大夫提
舉上清寶籙宮編類御筆兼禮制局詳議官校正內徑
同祥定官汝陽縣開國子食邑六百戶賜紫金魚袋臣
蔡脩奉聖旨題額奉議郎試辟靡司業臣李隲奉議郎
試辟靡司業臣程振

真東金石四卷四
五
按史是年十一月改元重和則十月以前得稱政和
年也此詔史所不載故備錄之

韶州府學有明宏治十七年東莞劉存業脩學記萬曆
二年黔南李渭重脩學記又有南康黃榮科貢題名記
永樂五年丁亥六月立石

舜峯寺碑

寺創建於宋紹興十九年此明成化庚子重脩碑也知
韶州府淳安王賓書

關帝現身像碑

韶城西南樓有關帝廟順治丙申五月二十日未時帝
見身於樓上披金甲藍紗巾立樓牖面北少頃面轉西
移時而沒兩岸居人皆見之且驚且拜二十一日二十四
二十五三十凡四日依時復見明年丁酉七月初十
二十四日依時復見或黃蓋或二將隨侍見者不啻千
萬人郡人黃思德勒像于碑以誌靈異阮亭先生皇華
紀聞載其事今碑存廟中碑下層有康熙乙酉邑人劉
樹琪紀康熙丁巳年七月九月帝顯靈保城事

吳道子畫張文獻像石本

韶州張文獻祠有唐時所寫鐵像又有文獻像一軸傳
為吳道子筆石上其模本也上有宋阜陵手題云唐曲

江公張氏九齡又書黃云鹿入深宮花解愁牛登高鼎
鍊位休當時若聽履霜語豈到峨嵋山盡頭 噫雖嘗
回奏薦而問公風度蒙大難而遣使祭饘不識噬臍禮
意曲江何似荊州淳熙十三年三月己酉朔絹本高二
尺四寸五分濶一尺二寸六分絹色黹黑像右旁有中
書省印上有建中元年贈司徒制楷亦方整下有明嘉
靖乙巳秋遠從孫岳惟喬謹識云是嘉靖甲辰夏于吉
永豐同姓人家購得之宋錄唐名臣後惟狄梁公段司
農郭汾陽與公四家子孫當受官者持畫像告勅元宗
御札詣闕下為左驗宣和中御札留秘府像仍歸其家

此其持詣闕下受官經阜陵御覽而為之讚與七月既
望模一本遺守祠孫澤禧俾度祠下并書其始末以告

之此所模一本予亦見之絹色位置題字印章皆宛然亦張氏家藏也
今城北九成臺上摹像一石是近時假守陳淮以摹本重鈎者

附錄贈司徒制正大厦者柱石之力昌帝業者輔相之
臣生則保其雄名歿乃稱其盛德飭終未允於人望加
贈實存乎國章故中書令張九齡維嶽降神濟川作相
開元之際寅亮成功謹言定其社稷先覺合於著龜永
懷賢弼可謂大臣竹帛猶存樵蘇必禁爰從八命之秩
更進三台之位可贈司徒公集中有辨證一條云贈司
徒舊史為至德初上皇在蜀思九齡之先覺下詔云云

仍遣使就韶州致祭新史云德宗建中元年賢九齡風
 烈贈司徒考之本紀元宗以天寶十五年當七月庚辰
 至蜀郡八月癸未朔赦天下癸巳靈武使至知太子即
 位丁酉稱上皇詔稱誥已亥臨軒冊肅宗自庚辰至己
 亥僅二十日且蒙塵之餘固無暇贈典神道碑但言發
 使至韶州弔祭而已新史蓋據碑也贈司徒當以建中
 為正諸道石刻錄云韶州唐張九齡司徒告建中元年刻又按米芾寶章待訪錄唐趙王傅徐浩書張九齡司徒告真蹟用一尺高絹書多渴筆詞內第
二句昌作匡臣作功

重刻張九齡神道碑

篆額唐尚書右丞相中書令張公碑

碑首云唐故金紫光祿大夫中書令集賢院學士知院
 事脩國史尚書右丞相荊州大都督上柱國始興縣開

國伯文□以下不可辨

銀青光祿大夫廣州刺史兼御史大夫持節充嶺南節
 度支度營田五府經略觀察處置等使上柱國會稽縣

開國公徐浩撰

有唐既受命在太宗時有若梁公房鄭公魏衛公李格
 于皇天在高宗時有若梁公狄格于上帝在中宗時有
 若平陽王張□□王桓□復宗社在玄宗時有若梁□
 □□平公宗燕公始興公二張□興王業夫以天柱將

傾大盜方起

刻本作啓誤

一振綱目再闡皇猷始興公為之公

諱九齡字子壽一名博物其先范陽方城人軒轅建國

弦派受氏良位為□□華才稱□□佐或相韓五葉或佐

漢七貂代有大賢時稱盛族四代祖諱守禮隋鍾□□

□□刻本離郡金山令

曾祖諱君政皇朝韶州別駕終於官舍

□為□□□大父諱胄

刻本諱下有子字非

越州剡縣令列考諱弘

愈新州索盧縣丞贈太常卿廣州都督皆蘊德葆光力

行未舉地積高而成嶽雲久蓄而作霖是生我公蔚為

人傑弱不好弄七歲能文居太常府君憂柴毀骨立家

庭甘樹數株連理王公方慶出牧廣州時年十三上書

路左燕公過嶺一見文章益深提拂厚為禮敬弱冠鄉

試進士考功郎沈佺期尤所激揚一舉高第時有下等

詢議上聞中書令李公當代詞宗詔令重試再拔其萃

擢秘書省校書郎應道侔伊呂科對策第二等遷左拾

遺封章直言不協時宰方□

此四字刻本無

諱滿拂衣告歸太夫

人在堂承順左右孝養之至閭里化焉始興北嶺峭險

峴絕大庾南谷坦然平易公乃獻狀詔委開通曾不決

時行可方軌特拜左

刻本右

補闕尋除禮部司勳二員外郎

加朝散大夫超

刻本起

中書舍人封曲江縣男轉太常少卿

出冀州刺史以庭闈在遠表請罷官改洪州都督徙桂

州都督攝御史中丞嶺南按察兼選補使黜免貪吏引
伸正人任良登能亮賢勞事澤被膏雨令行祥風屬燕
公薨落斯文將喪擢秘書少監集賢院學士副知院事
時屬朋黨頗相排根窮栖歲餘深不得意渤海王武藝
違我王命思絕其詞中書奏章不愜上意命公改作援
筆立成上甚嘉焉即拜尚書工部侍郎兼知制誥扈從
北苑便祠后土命公撰赦對御為文凡十三紙初無藁
草上曰比以卿為儒學之士不知有王佐之才今日得
卿當以經術濟朕累乞歸養上深勉焉遷公弟九皋九
章官近州里伏臘賜告給驛歸寧遷中書侍郎丁內憂

中使慰問賜絹三百匹奔喪南訃葬先塋毀無圖生
嗔不容粒白雀黃犬號噪庭堊素鳩紫芝菓植廬隴孝
之至者將有感乎既卒哭復遣中使起公奉官同中書
門下平章事口敕敦□□許為辭聞命號咷使者逼迫
及至闕下懇請終喪手詔曰不有至孝誰能盡忠累隸
之義不行蒼生之望安在朕以非嘗用賢曷云嘗禮哀
訴即宜斷表賜甲第一區御馬一刻本一下有匹字尋遷中書令
集賢學士知院事修國史初公作相也奏□擇元戎皆
取良吏不許入奏罷嘗戰諸軍共省年支賜袂臣儼議
事竟不行明奉公奏籍田躬耕禮節加金紫光祿大夫

進封始興伯□天長節公卿皆進寶鏡公上千秋金鑑
 錄述帝王興衰以為鑒戒公直氣鯁詞有死無貳彰善
 瘴惡見義不回范陽節度薛王奏前太子索甲二千領
 上極震怒謂其不臣顧問於公公曰子弄父兵罪當管
 况元良國本豈可動搖上目涕泣遂寢其奏武貴刻本
 離間儲君將立其子使中謁者私於公曰若有廢也必
 將興焉公遂叱之曰宮闈之言何得輒出御史大夫李
 公尚隱太府卿裴佑先不禮中官皆忤上旨必在誅讎
 公全度焉幽州節度張公守珪緣降兩蕃斬屈突□將
 拜侍中涼州節度牛仙客以省軍用將拜尚書並觸鱗

固爭竟不奉詔平盧將安祿山入朝奏事見於廟堂以
 為必亂中原□□□□上曰卿以王衍知石勒此何足
 言無何用兵為虜所敗張守珪請按軍令中留不行公
 狀諫曰穰苴出軍必誅莊賈孫子行令亦斬宮嬪守珪
 所奏非虛祿山不當免死再三懇請上竟不從邊將蓋
 嘉運等上策密發將士襲平西戎公以為不可妄舉結
 後代讐非皇王之化也上不納及羯胡亂常犬戎逆
 命元宗追嘆曰自公歿後不復聞忠謹言發中使至韶
 州弔祭其先見之明有如此者學究精義文叅微旨或
 有興託或存諷諫後之作者所宗仰焉上表論事事多

樞密入皆削藁人莫得知常以致君堯舜齊衡管樂行之在我何必古人由是去循資格置採訪使收拔幽滯引進直言野無遺賢朝無闕政百揆時序庶工允釐同儕見嫉內寵潛構罷公為尚書右丞相初不介意居之坦然執憲者索公所用劾奏權臣多官得罪借以為累貶荊州長史三歲為相萬邦在寧而善惡大分背憎者衆虞棧密發投孖生疑百犬吠聲衆狙皆怒每讀韓非孤憤涕泣沾襟開元二十八年春清拜掃南歸五月七日遘疾薨於韶州曲江之私第享年六十三皇上震悼贈荊州大都督有司謚行曰文獻公粵來歲孟冬葬於

洪義里武臨原近於先塋禮也夫人桂陽郡夫人譚氏循州司馬府君誨之子也澍慎宜家齊莊刑國珮環有節纂組皆工幼作女儀長為內則太夫人樂在南國不欲北轅克勤奉養深得婦禮至德二年十月六日終於私第春秋七十七晝哭闇問日月緜遠此八字刻本無同塋異穴

卜兆從宜公仲弟九臯宋襄廣三州刺史採訪節度經略等使殿中監季弟九章温吉曹等州刺史鴻臚卿腰金拖紫三虎為榮立德行政二馮推美嗣子極居喪以孝聞立身以行著陷在寇逆不受偽官及收復兩京特制拜朝散大夫太子右贊善大夫孫藏器河南府壽安

尉永保先業克稟義方姪殿中侍御史抗文吏雅才清
公賢操以兄拯早世姪葳器幼孤未建豐碑乃刻樂石
用展猶子之慕庶揚世父之美浩義深知已眷以文章
禮接同人惠兼錫舅薄技効德無愧其詞銘曰鳳生丹
穴鵬翥南溟天乘粹氣地發精靈傑出我公揚於王庭
甫稱降神說表騎星學究經術文高宗匠再掌司言爰
立作相忠義柱石謀猷帷帳王綱允釐帝采惟亮退居
右揆出守南荆玄鶴緝翼青蠅營營不暝猶視雖歿如
生昭昭令名千古作程
碑末云長慶三年歲次癸卯□月癸丑朔十二日甲子

□孫□□節度判官監察御史裏行仲舉建立曾孫承

奉郎虔州□以下不可辨

墳塋在西北去此□百四十□四步 曾□孫鄉貢□

□可渡同勾當立趙明誠跋作曾孫敦慶 玄孫鄉貢進士景新

玄孫鄉貢進士景以下不可辨 趙明誠跋當是景重

承務郎試秘書省校書郎□韶州曲江縣□□□篆

額 韶州軍□判官□士□試□書省校書郎林以下不可辨

□奉郎尚書屯田員外郎知韶州軍州兼管內勸□□

□□□□似是方字 湜重建 皇宗天聖八年□月重立石

於曲江張公以下不可辨

碑重立於天聖八年在歐陽公集古錄之前不知歐趙
二家所見者唐刻耶宋刻耶朱長文墨池編云中書令
張九齡碑徐浩撰并書長慶三年立則固唐碑矣而此
碑不著書人姓氏字雖出摹勒字法頗與徐似則亦粵
東之古刻矣

予訪求此碑歷七寒暑問之官吏問之土人問之張氏
子姓皆云久已前年謁公祠詩有徐會稽碑蹟竟湮之
句蓋亦信以為實也矣今按刻金石略至此卷適獲此
碑於韶城曲江祠後出諸土中完然豐碑而剝泐已甚
以志所載全文參讀疑者□之增諸卷帙亦一快事也

重刻張九皋神道碑

篆額具書唐銀青光祿大夫嶺南五府節度經略採訪
處置等使攝御史中丞賜紫金魚袋殿中監南康縣開
國伯贈揚州大都督府長史張公神道碑中大□行禮
部侍郎秘書少監蘭陵蕭昕誤明嘉靖二十四年夏五
月吉裔孫通議大夫都察院右副都御史奉勅提督兩
廣軍務兼理巡撫岳重立其文行書全錄於左

公諱九皋□先范陽人也昔軒轅少子以弦弧受氏別
封於張留侯以五代相韓安世以七葉榮漢特生間氣
鍾英大賢餘芳襲于令嗣矣晉末以永□南渡遷

於江表皇朝臣曰官樂土家於曲江高祖古禮隋鍾離
郡塗山令曾祖君政皇朝韶州別駕祖子曹皇朝越州
剡縣令烈考弘愈皇□□太常卿廣州都督皆世濟明
德不隕令名公特稟中和誕生溘懿恭推色養孝自曰
心幼歲丁太常府君憂孺慕街哀乘棘無怙毀能達理
□□成人及日月紅除而頌復就養思致遠親之祿方
求筮仕之階羸金不珎琢玉成器殖學以明道修身以
踐言弱冠孝廉登科始鴻漸也嶺南按察使尚書裴佖
先募府求賢輶車問俗以公後進之秀籍以送軍表授
海豐郡司戶水變貪泉珠還合浦時所稱也其後五溪

阻兵群蠻聚□帝命按察使裴佖先討焉以公有罇俎
之謀韜鈴之用奏授南康郡贛縣令於是坐其帷幄置
以戎車公武能宣威文可化俗軍需倚辦供□無留前
宣慰使御史梁勛奏公清白有聞後宣慰使竹承構奏
公戶口增益共稱尤異褒進上聞特加朝散大夫迂巴
陵郡別駕初丞相曲□公之元昆自始安郡太守兼五
府按察使以為越井殊方廣江剽俗懷柔之寄實在腹
心奏公俱行可為同氣遂授南康郡別駕季弟九章以
為桂陽郡長史太夫人在堂賜告歸寧承歡伏膺白華
共展於朝夕衣錦時入於鄉閭棣萼美於詩人德星聚

於陳氏代所稀也無何丁於內艱柴毀莞莞勺飲不納
至性聞於州里孝感達於神明白雀馴狎於倚廬黃犬
隨號於行哭表其異也服闋除殿中丞又遷尚書職方
郎中起草含香停車待漏位高立象職在彌綸及曲江
公翊贊廟謀鹽梅鼎實講德論道求賢審官以識量通
明與聞其議故能致君堯舜克濟忠貞公之佐也及元
昆出牧荆鎮公亦隨貶外臺遂歷安康淮安彭城睢陽
四郡守所蒞之邦必聞其政作人父母為國循良於是
瑞鵲成巢嘉禾合穎祥烏素翟而狎至焉考績議能詔
書褒異遂遷襄陽郡太守兼山南東道採訪處置使以

連率之權授以澄清之任化行江漢惠及黎民進封南
康縣開國男賞有功也屬南夷不羆西蜀騷動犄角之
勢連於嶺隅以公有經略之才委公以干城之任乃除
南海太守兼五府節度經略採訪處置等使攝御史中
丞賜紫金魚袋天書盈篋廐馬在庭恩華寵光旁於道
路公召募敢勇繕治樓船綏懷遠人安集獷俗或指劍
□之路或出銅柱之鄉以迴舶邇糧省泛舟之役以于
來授甲寬土著之人寄用務殷用省功倍天子加之特
賜銀青光祿大夫兼手詔益封開國伯食邑七百戶旌
其能也且五府之人一都之會地色山洞境濶海壖異

域殊鄉往來輻輳金貝惟錯齒草實繁雖言語不通而
贄幣交致□禁其豪奪招彼貿遷遠人如歸飲其信矣
秩滿遷殿中監皇輿盡飭玉食惟精六尚煩委一心主
辦服御器用必信必誠勤勞不遑內積憂□以天寶十
四載四月二十日疾亟薨于西京常樂里之私第春秋
六十有六嗚呼哀哉哲人其萎邦國殄矣皇上哀悼賻
贈盈門給逋還鄉首□歸本遂贈廣陵郡大都督府長
史禮儀哀制延素握髮可謂飾終以明年葬於始興郡
洪義里武陵原夫人弘農譚氏襄陽郡夫人國子博□
知幾之子克訓母儀用光閭則粵以永泰三年薨南康

郡次以大歷四年合祔焉禮也嗣十一人長曰擢前瑞
州刺史次曰擢前右金吾衛□曹叅軍次曰擢試大理
直康州刺史次曰抗檢校戶部郎中兼御史中丞賜紫
金魚袋朔方邠寧節度行軍司馬次曰擢前弘文生皆
王之蓋臣國之多士令德之後必大其門公嘗與季弟
同泛滄溟舳舻艤艫凡數百輩忽驚颺震發駭浪山連
當呀呷之時謂汨沒同盡為猿為鶴曷□保焉而中宵
返風漂泊孤嶼遲明相視各在津亭同役之人僅有在
者則知商邱蹈信入之而不傷呂梁履忠游之而莫喘
愷悌君子福祿綏之宜其克享永年亦既逢吉且公之

立身可謂盡美居喪致哀稱其孝也入幕決勝稱其才也列在藩翰則德化之政聞授之斧鉞則式昌之□著佐元昆則潤色王業睦諸季則致美閨門至於推挽忠良揄揚俊乂力行不怠時議高之夫生死有懷古今同盡歿而不朽君子避之昕□跡儒林嘗讀舊史覽賢人之事業知盛德之在焉敢揚休聲以誌貞石銘曰軒轅錫美百代蕃昌弦□得姓受邑於張五代相韓七貂居漢平子數術茂先翊贊誕鍾餘堇克享大名爰至我公天姿挺生率□立身依仁從政學該百代官踰三命再登幕府四列藩條威行節制化合謳謠作牧襄陽授兵

南越江□底定要荒胥悅死生有命修短靡長禮贈殊秩魂歸故鄉梧楸成列邱陵無改夏日冬夜精靈斯在此碑在文獻墓上今已泐為兩段陳思寶刻叢編云唐張九臯碑工部尚書蕭昕撰九臯孫曹州刺史仲方書長慶三年立按史仲方九臯曾孫不言其刺曹州也今据碑蕭昕街亦非工部尚書

又墓田一碑韶州府為查給官田設立人戶看守名臣墳墓本府知府符錫申詳上司批准撥田給帖付照仍勒之石後開古塋一座中文獻公墳下即夫人墳前右殿中丞九臯墳前左太常卿九章墳後開撥与看墳人

耕管官田畝數併條約嘉靖二十一年壬寅季夏韶州府知府新喻符錫謹書

文獻祠下又有斷碑一截記重修祠事是元延祐丁巳廬陵曾三省記并書僅存數行与篆額而已

又有明宏治庚申武進徐絃記脩祠數語系以詩并書文獻又有祠在大庾嶺嶺際穹碑數通一碑風度維巖四字字運二尺外康熙癸丑冬十月山左膠西宗世勳八歲題并書又一碑雁回人遠四字字亦運二尺許欵同字益雄勁不似八歲兒所書或又相傳是一婦人所書託之八歲兒然亦不似婦人書也此外惟華亭沈宗

敬所書海天一線四字差佳

曲江下三十里白芒石壁臨江刻迴龍山三大字不著書人名氏

曲江余襄公墓道歐陽文忠所撰碑訪之不獲

陳白沙風采樓記

樓在韶州府城內與風度樓相望明宏治十年太守錢君鏞建以祀余襄公本蔡君謨詩必有謀猷禪帝右更加風采動朝端也其冬十二月白沙陳獻章記并行州書碑已半泐字勢尚勁逸之甚

樓又有嘉靖十三年歲在甲午庚午月端午日賜進士

及第添註信宜典史前翰林院國史編脩文林郎經筵
官金華程文德舜敷撰重建記

方信孺虞泉銘

八分書碑在韶州西北皇岡舜祠下虞泉銘并序知英
德府真陽縣事方真孺書權發遣韶州軍州事方信孺
撰韶之西北有山聯縣如屏障是為皇岡虞祠奠其麓
刑獄使者廖公德明既作新之缺一字似是復有泉出祠東崖其
流所以資灌溉給飲濯者甚遠甘而缺一字志作潔今審視當是列與他泉
異余仲夏有事祠下退而相羊林澗間曰謂泉於是乎
出幸託虞祠相為始終而名獨未得與舜峰韶石班雖

泉之不遭亦好事者責也遂名曰虞泉又記黃太史詩

有為舜泉作者注云河北酒名也既以名泉又曰泉以

名郡齋之酒它日與客酌泉飲酒念當有以被金石使

後之人知名缺一字似是思始為之銘曰蒼梧之墟維舜迹只獲

闕宮堯鎮南國只山川艸木麗此五字据別本補入今昔只韶之大

全此二字別本作有聖誤猶仿佛只彼皇岡下新宮翼翼只流泉奮發

貫東甌只晝夜混混不涸不溢只耕者居者普潤澤只

后皇遺祥為帝出只肇錫嘉名孰賓熱字只謂舜何峰謂

韶何石只豈泉之清不稱德只會稽有井石缺一字泐只豈

韶缺一字似是之泉匪是匹只自我作古詔罔極只酌泉而羞缺一字

時格只釀泉而醴人字缺懌只銘以歌之宜琴瑟只皇宗

嘉定庚午七月丁亥朔刻下有章貢蕭茂四字以下不

可辨蓋鑄人姓名也

粵東金石略卷第五

韶州府金石二

蔣穎村續武溪深詩碑

在韶州西武溪亭上亭今為九城臺碑高六尺濶三尺
五寸其額正書寶文蔣公武溪深詩八字下前刻馬援
辭後刻穎叔和續詞云飛湍瀑流瀉雲岑砰激百兩雷
車音吾聞神漢之初始開斲史君姓周其名煜至今廟
在樂昌西苔蘚殘碑僅堪讀武水之源自何出郴州武
縣鷓鴣石南入桂陽三百里浚瀨洪濤互滂射其誰寫
此入新聲一曲馬援門人笛南方者舊傳此水昌樂之

瀧茲乃是退之昔日貶潮陽曾到瀧頭問瀧吏我今以
選來當禹事與昌黎殊不類未嘗神色輒慳慳何至形
容遽憔悴但憐歲晚毛鬢侵故園一別至於今溪光菴
畫清且淺朱藤覆水成春陰何為去此嬰朝簪翩然足
馬馳駸駸兩踰瘴嶺窮崎峯梅花初開雪成林韶后衍
佛聞舜琴曹源一滴清人心遠民安堵年穀稔百蠻航
海來獻琛嗟余才薄力不任報君夙夜輸誠忱布宣條
教勤官箴有佳山水亦幽尋樂乎吾樂何有極不信愁
歌武溪深自跋云李君以神漢桂陽太守周府君功勳
紀銘為示碑尾云大和九年五月重修歐陽永對集古

目錄跋云此君檢漢書無之今碑石缺亡其名惜乎遂
不見于世也南人紀其所修瀧水即韓文公所謂昌樂
瀧是也至今以為利祠宇甚嚴云余讀韶州圖經云周
史君廟在樂昌縣西北一百八十里武溪上舊經云後
漢桂陽太守周君光開於瀧故立廟武溪驚湍激石流
數百里昔馬援南征其門人爰寄生善吹笛援作歌以
和之名曰武溪深其辭云周史君開此溪下合真水
碑在廟中郭蒼文但云府君字君光而已其名訛缺不
可辨圖經說周使君亦不著其名李君嘗泚諸碑辨之
乃是煜字永叔但得墨本故莫能考也余讀退之瀧吏

詩云南行踰六旬始下昌樂瀧獨疑樂昌昌樂之名不
 同遂移書字李君峇曰樂昌縣五里有昌山有樂石尤
 大當是樂昌以縣名昌樂以山名瀧今在縣上五里余
 乃釋然無疑矣曰感馬援之意續而成之為武溪深一
 章云元祐二年十一月卅日當禹府中書後又刻所作
 書南雄昌樂驛七絕一首自注云欲以見驛名亦以昌
 樂也又望韶石七絕一首末有元祐三年戊辰正月晦
 日真陽貢士李脩立道跋下又云門生廣文館進士李
 脩題額并立石碑尾小字一行云右朝散郎知韶州軍
 州事譚粹元祐癸酉季秋六日自延祥禪院移立武溪

亭

按穎州元祐二年知廣州又譚粹知韶州
據韶志載在元符元年當以此后為正

粵東石刻以周府君碑為最古碑建於漢靈帝熹平三
 年荆州從事曲江郭蒼伯起撰頽藹古藜辨云韶州圖經云郭蒼文
按碑曲江長區社与邑子故吏龔臺

郭蒼龔維等命工建碑於瀧上勒銘公功蒼亦
命工建碑者非撰碑之人圖經之不足信如此歐陽公集古錄目云在

韶州樂昌縣昌樂瀧上周君廟中釋釋云今碑在韶州

張九齡廟中今皆不可問矣都穆金薤琳瑯此碑元季廬陵陳謨跋
謂漢刻本在瀧上唐重刻本在曲江廟

中不知何時徙置郡學韶州守錢旭既新府治以韶在漢屬桂陽乃徙置之後揚
文貞公跋亦云碑在韶州府治按府治今為王府碑由是仍徙曲江廟中東廣
漢碑絕少所
有惟斯而已韶州府及曲江樂昌二縣志皆載其文樂昌志

所載一篇曰張鹵撰鹵不知何時人其文稱茲熹平三
 年云云而後引昌黎驅鱷魚事真千古笑柄韶州府曲

江縣二志所載文大略相同皆曰名昕洪氏錄釋載此文是憬字廣東新語云憬或作曝今錄釋全文於此

神漢桂陽太守周府君功勳之紀銘隸額 歐陽集古錄云碑首題云神漢者如唐人云

聖唐尔盖當時已為此語而史傳他書無之獨見於此碑也趙氏金石錄目云第一百三十三漢桂陽太守周君頌熹平三年五月又按天下碑目作桂陽太守周

使君碑

桂陽太守周府君者徐州下邳人也諱憬字君光體性

敦仁天姿篤厚行興閨門名關州里舉孝廉拜尚書侍

郎遷汝南固始相遂拜桂陽廼宣魯衛之政敷二南之

澤政以德綏化猶風騰撫集烝細關綏有方進則貞直

退則鎔枉崇舉濟濟吉士士充朝招訓關蒙開誘六蔽

君子道長小人道消信感神祇靈瑞符關嘉穀生於野

奇草像蓬蒿異相之樹超然連理於此關時邦域惟寧

郡又與南海接比商旅所臻自瀑亭至乎曲紅壹繇

此水其水源也出於王禽張遷碑問禽符所有之山山蓋隆關三于天

泉肇沸踊發射其巔分汜離散為十二川彌陵隋阻公

阜錯連隅陬塵藹過未繇騁焉爾乃貫山鑛石經關四揚

争怒浮沉潛伏虵龍蝓屈澧隆鬱繇辨云澧借為豐字池千渠萬澮

合聚谿澗下迄安甌六瀨作難湍瀨蚤蚤泣汙潺湲雖

詩稱百川沸騰高岸為谷深谷為陵盖莫若斯天軌所

經惡得已改其下注也若奔車失戀狂牛無縻關勿荒

勿臚睦不相知及其上也則羣輩相隨檀柁提關唱號

慷慨沈深不前其成敗也非徒喪寶玩墮珍奇替珠貝

汜象犀也往古來今變甚終矣於是府君乃思夏后之

遺訓關應龍之畫傷行旅之悲窮哀向人困厄感蜀守

冰殫絕犁雕離堆嘉夫昧淵永用夷易廼命良吏換

獎字字原誤釋作將帥壯夫排積膝磐石投之窳關高填下鑿截回

曲彌水之邪性順道其經脉斷破溢之電波弱陽侯之

汹涌繇是小溪乃平直大道允通利抱布買絲交易南

至升涉周旋功萬於前除昔關樹塞基於茲雖非龍門

之鴻鴻呂大臨考古圖卡旅禹釋云按周憬功勳銘內鴻字工作卡績亦人君之德宗故胎船

人嘆於水渚行旅語於涂陸孔子曰禹不決江疎河吾

其魚矣於是熹平三季歲在攝提仲冬之月曲紅長零

陵重安區祉字景賢遵承典圖宣揚德訓帥禮不越欽

仰高山乃與色子故吏龔臺郭蒼龔雒等命工擊石建

碑于瀧上勒銘公功傳之萬卉垂示無窮其辭曰乾以

剖兮建雨字原誤作克儀剛栗兮有險夷谷中獄兮穆崔嵬

嘆衡林兮獨傾虧增陵峭兮甚隘崎鉉莫涉兮禹不規

仰王禽兮又崑崙俯瀧淵兮坦以悲岸叅天兮無路溪

繇釋云小溪路溪皆為蹊石縱橫兮深洄波隆隆兮聲若雷或抱偵兮

以從利或追息兮有赴義泥自楫兮有不避關躬軀兮

鵠字季產故吏曲紅黃祺字對仁故吏曲紅周習字仲
鸞故吏曲紅劉越字子省故吏柳褚禧字開讓故吏禾

陽蔡闕字已明故湏陽左尉零陵原陵闕二故吏湏陽劉

明字仲闕故吏湏陽左滕字仲升故吏湏陽左蘇字妙

舉故吏湏陽宋碩字子張故吏舍涯堯禹字公制故吏

舍涯張邵字寧威故吏舍涯黃詳字伯節工師南陽宛

王遷字子彊趙明誠金石錄右漢周府君碑陰題名凡三十一人姓氏具存按

鄆道元注水經瀧水南逕曲江縣東縣昔號曲紅山名也而

東西兩漢史皆作曲江今據此碑自縣長區祉而下凡十七人皆書為曲紅則是

當時縣名曲紅無可疑者不知兩漢史皆作曲江何也而洪氏錄釋云右周憬碑

陰宰曲紅者一人貫曲紅者十六人熊君碑亦同兩漢書皆作曲江諸家地理書

皆云水流屈曲故曰曲江唯水徑云縣昔號曲江山之名也前書工女大功皆只

同用紅字未知水徑何所據也按按民校尉熊君碑除補桂陽曲江長又洪氏錄

續云周憬碑錄額二行行四十二字後有餘石碑陰上一列二十二

人下一列前空七行所題者

八人又空六行刻工師姓名

蘇文忠九成臺銘

韶州九成臺舊名聞韶臺在北城上建中靖國元年蘓
子瞻與蘓伯固北歸郡守狄咸延之臺上伯固謂舜南
廷奏樂於此臺宜名九成子瞻即席為銘自書刻石臺
上後以元祐黨事碑毀臺廢遂以西城武溪亭為臺下
臨武水臺屢廢屢修今碑是明嘉靖丁亥符通判錫書

韶州集作陽太守狄咸新作九成臺玉局散吏蘇軾為之銘

曰自秦并天下滅禮樂韶之不作蓋三千三百一十有

三年矣集作千三百一十有三年矣是也此石本訛出三字方綱按秦始皇帝

不知何以云一
十有三年也

其器存其人則韶既已隱矣而况集字人器

兩亡而不傳雖然韶則亡矣而有不亡者存盖嘗集作與

日月寒暑晦明風雨並行乎集作天地之間世無南郭子

綦則耳未嘗聞地籟也而况得聞其天籟集作而况得聞於天
按天字係韻脚石本

說出
籟字使耳得集無
得字聞天籟則凡有形有聲者皆吾羽旄干戚

筦磬匏弦嘗試與子登夫韶石之上舜峰之下望蒼梧

之渺莽九疑之聯綿覽觀山川集作
江山之吞吐草木之俯仰

鳥獸之鳴號衆族集
聚之呼吸吐來唱和非有度數而均

節自成者非韶之大全乎上方立極以安天下人和而

氣應氣應而樂作則夫所謂簫韶九成來鳳凰集作
鳥而舞

百獸者既已粲然畢陳于前矣建中靖國元年五月吉

日集作正
月一日眉山蘇軾記

宋碑不知毀於何時至我明嘉靖改元壬午太守周牧

刻石丁亥太守唐昇又刻之通判符錫書

蘇集中九成臺銘及南華題名皆在建中靖國元年正

月一日按元符三年庚辰五月先生自昌化貶所移廉

州安置六月二十日渡海七月初至廉八月授舒州團

練副使永州安置十一月復朝奉郎提舉成都玉局觀

任便居住先生行至英州聞玉局之命故此銘稱玉局

散吏也是年在韶州度歲次年辛巳正月五日過嶺至

南安軍是銘為正月一日作無疑今石本乃作五月蓋
重刻時傳寫之訛耳 又按東坡何公橋詩洪容齋三
筆以為建中靖國元年還自海外時作查氏刻補注本
疑其未足据依施氏原奉載入紹聖元年卷中今按英
州小市古韶城尚一日之程正月五日即過嶺至南安
豈有開歲尚在英之理益見施本為是
文忠書九成臺額

文忠所書銘既巨後人摹其所書九成臺三字一勒符
書碑首一勒武溪深碑陰而碑陰所勒較善右曰狄咸
作左曰蘇軾書碑陰又有公所書思古堂三字右曰伯

通作左曰子瞻書伯通當是狄守字耳其下有九成臺
三大字篆書寬九寸高各一尺三四寸左刻新湖南漕
文公篆右刻郡守狄咸摸上石

韶州府解政寶堂三字亦公手書字各高三尺寬二尺
許舊有楊誠齋跋乾隆戊子正月九日方綱手摹俾太
守勒石解中并錄誠齋跋于後

陳文惠書堯譽亭字

八分書長寬俱一尺一寸咸平四年夏陳文惠公書府
志謂亭在城艮隅已不可攷今勒此于武溪深碑陰文
惠名堯佐閩中人述古之父也其八分最有名點畫濃

重世謂之堆墨書今觀此三字信然

陸放翁書詩境字

亦在武溪深碑陰每字長八寸左陸游書三字右跋云
開禧丁卯正月書時信孺丞蕭山而放翁退居鏡_{字缺}奉
八十三矣後五年嘉定辛未信孺假守曲江謹撫刻于
武溪深碑陰九月旦莆田方信孺識按信孺字孚若知
真州有好菴遊戲詩境集劉後村序之曰公詩文操簡
立成宮羽協諧經緯麗密嘗有題龍隱巖詩云人事百
奉俱變滅祇應題字不塵埃今此段字亦秀勁足與陸
書相配放翁以寧宗嘉泰三年升寶章閣待制致仕居

若耶溪至嘉定二年卒年八十五辛未是嘉定五年
九成臺上又有明萬曆十八年知韶州府樵李陳奇謀
重修記又有萬曆九年廣州司理陳紹功省月臺記省
月臺即九成臺也

韶又有通天臺臺惟明嘉靖己酉南寧陳大倫詩一碑
又芙蓉山諸詩碑並無足錄

韶州永通監記

篆額韶州新置永通監記八字碑文正書末云時天子
親享明堂之歲十月初三日光祿少卿分司南京余靖
記江夏黃昌齡書并篆額

光運寺碑

寺在府城河西余襄公塔銘不可見今惟存甯通證誓
大師碑碑額與文皆正書淳熙三年八月朔立石免解
進士章貢孫時敏撰并書文林郎知梅州程鄉縣事主
管學事周南張槩題額

開元寺重塑佛像記

熙寧七年甲寅歲二月十日將仕郎守韶州長史權監
英州宜安鎮鹽稅李駸撰本州書表司鄺強書并篆
南華六祖墜腰石刻字

石高一尺寬二寸一分中一行鐫師墜腰石盧居士誌

八字右云龍朔元年鐫左云桂林龔邦柱書曹溪通
志云師往黃梅禮五祖應對契旨恐人害之着槽殿玄
後五祖至碓房見師腰石舂米語曰求道之人當如是
乎龍朔元年師受衣鉢南歸石田黃梅上刻云至明
嘉靖間有韶州人仕於黃梅者遂持歸曹溪今存焉按
六祖傳云造黃梅尋忍大師適咸亨二年也龍朔在咸
亨之前相去十年石上之字當屬後人所刻故年月不
符耳且既稱師墜腰石而又云盧居士誌文法不相連
屬字畫亦不佳未可曰龍朔字而目為古刻也又劉禹
錫大鑿禪師第二碑云三十出家六祖生于貞觀十二

年至咸亨二年三十四歲與劉碑合但不知龍朔元年
字何以不符至此且黃梅東禪寺仍有一隆腰石渙洋
皇華紀聞亦載之則此石殆亦未可信也

重刻柳子厚大鑿禪師碑

南華王維劉禹錫碑皆不存獨重刻柳碑猶存曹溪第
六祖賜謚大鑿禪師碑河東柳宗元撰唐元和十一年
正月三日立石蘇文忠書後云子厚南遷作曹溪南嶽
諸碑妙絕古今而南華今無刻石者長老重辯具石請
余書其文唐史元和中馬摠自虔州刺史遷安南都護
徙桂管經略觀察使入為刑部侍郎今以碑考之蓋自

安南遷南海非桂管也韓退之祭馬公文亦云自交州
抗節番禺曹溪謚號決非桂帥所當請以是知唐史之
誤當以碑為正按此則碑在宋已不存今併文忠所書
亦無知之者此石乃明嘉靖乙巳韶州守南寧陳大綸
重刻大綸跋云傳山人自閩來遁居予出訪曰為予書
重刻蘇文忠卓錫泉銘

明嘉靖戊申至日韶州知府陳大綸推官李鶴曲江知
縣王欽重立不著書者姓名志稱大綸字豹谷廣西人
善書筆法道勁則此銘或即陳所書乎其文与集本小
異今錄於左

六祖初住曹溪卓錫泉湧清涼滑甘贍足大衆遠今數
百年矣或時小竭則衆汲於山下今長老辯公住山四
歲泉日湧溢聞之嗟異為作銘曰祖師無心心外無學
有來扣者雲涌泉落問何從來初無所從若有從處來
則有窮初住南華集衆湏集誤水水性融會豈有無理引
錫指石集誤寒泉自泚衆渴得飲如我說法云何至今有
溢有枯泉無溢枯溢集誤其人乎辯來四年泉水洋洋煎
煮濯溉飲及牛羊手不病汲肩不病負甕勺瓦盂莫知
其故我不求水水則許我訊於祖師有何不可此句集誤作其亦可哉

周瑯遊南華詩

石刻五言古詩二首後題兩山周瑯瑯斬水人嘉靖十

四年任提學

胡汝霖卓錫泉亭詩

石刻五絕二首嘉靖甲寅季秋廣東提學僉事蜀左綿
胡汝霖題自注云亭有東坡泉銘所見者或亦重刻碑
耳

重刻蘇程菴銘

程公菴南華長老辯公為吾表弟程德孺作也吾南遷
過之更其名曰蘇程且銘之曰辯作菴寶林南程取之
不為貪蘇後到住者三蘇既住程則去一彈指三世具

如我說無是處百千燈同一光一塵中兩道場齊說法
不相妨本無通安有礙程不去蘇亦在各遍滿無雜壞
此宋端明學士蘇公軾紹聖元年甲戌八月過南華作
崇禎乙亥六月望日電士余大成書後云、知韶州府
事貴竹楊起鰲勒石文內云大索公所書卓錫泉銘抑
子厚大鑿碑及所作小記而皆非其故徒增憑弔

至元四年鍋字

南華禪堂左廊香積厨有大銅鍋聞其上有至元四年
鑄字今已塵積不可盡識洗剔之畧可辨者差督理廣

東^缺處地方珠池市船^缺監太監西晉長治^字李鳳喜

捨二十三字

明憲宗御製六祖壇經法寶序符錫書

成化二十一年十一月朔日製序後有嘉靖二十一年

夏五月韶州知府符錫拜首謹志是日同知俞慶雲教

諭蔡密同加瞻禮

米元章書墨池字

二字長潤皆尺數寸許後跋云米公余鄉^缺語蘇東坡

稱其奔軼絕塵之品超妙入神之字清新絕俗之文初

補校書郎接洽光尉人德祠之余叨令英州偶過舊地

見公真跡猶存回摹鑄之康熙丙午襄陽揚柱臣書

按洽光即洽漑古洽漑縣在英德西百里漑水山海經謂之湟水徐廣曰湟水一名漑水出桂陽亦曰漑水韶州志載趙佗置合漑浚陽二縣合漑屬南海郡漢改屬桂陽郡隸荊州三國屬吳大帝黃武五年又屬廣州孫休永安四年改屬始興郡宋元徽四年以漑字為光改縣曰洽光其載米官亦曰洽光尉與此跋同而陽山志載米官洽漑尉水經漑水出桂陽縣盧聚東南過洽漑縣南出漑浦關為桂水是漑漑二水不知何以有洽漑之名當是漑漑字相近而訛耳光亦作漑

米元章書寶藏字

字長各二尺餘濶各近二尺學博士米芾書此碑元在洽洗司今移英德縣內

趙秋谷觀音巖詩刻

英德觀音巖石壁臨江洞穴天造前人題刻皆不甚稱巖口左壁上有觀音巖三大字下有秋谷詩云艤舟仰崇巖不雨露自滴躡級凌空行導火捫星入屢轉失向背絕頂得開闢佛座積香烟出戶孤雲直輪囷青蓮花百丈燭江色前見萬嶺屹爭頭刺天碧非惟閱幽峭亦復豁胸臆安得桓子野臨波弄長笛康熙丁丑益都趙執信題并書又有舟中觀英德瀕江諸山詩不具錄

英德下流五十里有峽山廟一曰大廟舊有秦時犧尊
制作奇古宋宣和間有取之者舟出峽風濤大作懼而
還之廟中今亦不知何在矣又王渙洋北歸志載大廟
峽貞惠夫人祠有宋嘉定碑稱神虞氏英州人生能抗
黃巢之鋒死能制峒寇之暴蓋唐人也今碑亦不存

余襄公耽石院記

在韶州翁源縣淨源山石壁上朝散大夫光祿少卿
今司南京上騎都尉曲江縣開國子食邑六百戶賜紫
金魚袋余靖撰末云皇祐元年八月日記皇宋至和三
年三月十日住持僧法沙門省功建潁川巢玉書進

士巢迪篆鄭祚刻

乳源南漢碑

在乳源縣雲門山碑首云大漢韶州雲門山大覺禪寺
大慈雲匡聖弘明大師碑銘并序西御院使集賢殿學
士御前承旨太中大夫行左諫議大夫知太僕寺事上
柱國賜紫金魚袋臣陳守中奉勅撰末云維大寶七年
歲次甲子四月丁未朔列聖宮使甘泉宮使秀華宮使
翫華宮使開府儀同三司行內侍監上柱國臣李托玉
清宮使德陵使龍德宮使開府儀同三司行內侍監上
柱國武昌縣開國男食邑三百戶臣龔澄樞奉勅建右

街大乳亨寺內殿供奉講論兼表白意法大師賜紫沙
門臣行脩奉勅書右龍虎軍控鶴將軍陪戎副尉臣孔
廷謂臣孔廷津臣陳延嗣臣鄧懷忠等鑄字 行楷書

仿懷仁聖教序 內書地
為坐

碑內稱漢明帝為我祖又稱睿聖文武隆德高明弘道
大光孝皇帝此謚十國春秋無之陳守中行脩俱無傳
又十國春秋有僧文偃傳即此碑所稱大師也傳云謚
大慈雲匡真弘明禪師真字蓋聖之訛

王象之輿地碑目韶州碑記條下有乾符元年重修東
廳壁記長慶元年新修虞舜廟碣文白石居易張尚書碑

銘皇甫湜朝陽樓記余靖修衙記韶石亭記湧泉亭記
真水館記張栻濂溪祠堂記楊萬里州學張公余公祠
堂記朱晦菴州學濂溪祠堂記四齋銘 崇德廣業居
仁由義四齋 今皆不
存

Blank manuscript page with vertical columns.

